





1849



潜研堂文集


二






Blue Cyan Green Yellow Red Magenta White 3/Color Black

TIPPEN Color Control Patches

© The Tiffen Company, 2007







潛研堂文集卷四十一

嘉定錢大昕

碑

紀王廟碑

由嘉定城而南五十里吳松江之陰有紀王廟者祀漢  
紀將軍村人奉以爲土地之神吳俗祀土地神多稱爲  
王曰紀王者從毗俗之稱也謹按王以身死事免漢高  
帝于大難智勇忠義赫赫在人耳目榮陽立廟祀之世  
世血食若大江以南疑王生平足跡所未至者予讀陸  
務觀渭南集載乾道元年直敷文閣知鎮江府方滋言

府故時祀紀侯爲城隍神莫知其所由始然實有靈德以庇其邦人願有以褒顯之有詔賜廟額曰忠祐則王之廟食江南由來舊矣紀出自姜姓子孫以國爲氏漢初有紀成者與王並爲將軍一死好時一死榮陽史漢皆不爲立傳莫詳其里居世系成子通以父死事侯襄城而王之後嗣無聞意者史家表次功臣猶有漏落歟抑以無後而賞不及歟將漢誠少恩妨功害能之臣抑其賞而不行歟然傳漸蒯成之傳具在讀史者罕能誦其全文獨王之事閭巷皆能言之可知垂名之遠在乎列傳與否襄城之侯閱四世以無後國除而王廟食

百世始自榮陽逮于江左又知食報之長不在乎得侯與否也然則天之所以待忠義者固不厚乎予少時授徒塢城東顧氏往來過斯廟拜謁神像肅然起敬屈指垂三十年矣乾隆甲午夏村中耆老寓書京師令予文其麗牲之石因作神絃曲俾春秋歌以侑祀其辭曰神之來兮雲間風颯颯兮晝寒黃屋兮左纛呼萬歲兮前導憤王兮重瞳玩之兮掌中身雖熱兮不朽立廟食兮長久江之南兮東海涯魂魄游兮無不之聰明兮正直尸而祝兮社而稷神具醉兮福我民俾孝弟兮睦婣不鬪兮不訟朝出耕兮夜誦木棉黃兮藍艸青嘉穀蕃

兮蟲不蠟操豚蹄兮報祀歲共有兮白今始

甘肅提刑按察使司按察使宋公神道碑

公諱弼字仲良別字蒙泉山東德州人先世有諱性者仕明至刑部右侍郎佐夏原吉治浙西水利有功曾祖炳肅州兵備按察司僉事祖兆李郟城縣教諭贈儒林郎父來會贈奉政大夫公少而英特補博士弟子歲科試恒屈其儕故事學使者間歲拔諸生之秀者州縣學各一人貢成均自郟城至公三世皆登斯選士林榮之乾隆三年舉順天鄉試十年成進士改庶吉士散館授翰林院編修未逾月御試乾清宮入高等方擬擢用

以父憂去職服闋還朝充武英殿提調續文獻通考

纂修官以省母請假家居數年事生送死以禮還朝署

日講起居注官扈從南巡宣示御製詩輒與賡

和再充續文獻通考纂修官同事十數人皆公後進徵

文獻者咸以公爲歸性勁直不隨人俛仰酒酣縱談古

今意氣豪邁然非先哲法言不道也錢塘梁文莊公總

裁書局論議或與公不合公往復辨證必盡其說文莊

始雖愠而卒推服之二十八年御試正大光明殿引

見有旨令以原官休致而總裁諸公合詞奏公學

問篤實著述專勤請留之書局由是供職如故三十年

遷右春坊右贊善其秋授分巡鞏秦階道陞辭 召見  
奏事大稱 旨到官卽往伏羌徵禮諸縣察地震民被  
災者振之明年調整飭甘肅道所治在嘉峪關內七十  
里當西域孔道使者往來無虛日公訪問西域風土物  
產古人所未紀者各綴以詩凡百篇募民願徙烏魯木  
齊者得三百戶公親勞而遣之出關無一人滋事者盜  
匿高臺山詭云采金旬日聚三百餘人公聞之親率兵  
仗捕其魁置之法雪山文殊口水暴至注肅州南郭壞  
民廬舍公登城具牲牢爲文祭之水果止玉門之牛尾  
山出硫磺朝議令肅州募民采煉以供巴里坤軍用初

未有定數也州募商煉得三十萬斤報布政司司移問  
安西提督則荅以歲需不及二千斤而州續得磺又三  
十五萬斤有奇布政司以州擅動庫銀所貯磺無所售  
日久且徵敗將責償于官吏公檢州庫舊磺經三十餘  
年無徵敗者乃上議制府曰安西重鎮也儲火藥宜多  
提標諸營歲取磺巴里坤哈密二庫儲之可補官庫之  
乏頃聞烏魯木齊遣人購磺肅州是安西歲需不止二  
千宜於玉門縣貯三十萬斤以待安西各標及烏魯木  
齊之用甘肅提鎮兩標歲取磺肅州州見佇僅支三四  
歲宜分二十萬斤貯之州庫又甘肅所屬諸鎮皆于蘭

州買礪州存礪亦少若令赴買玉門而減直以予之則  
餘十五萬斤亦可分銷議上事得行果便公之通達政  
體多此類三十三年三月擢甘肅按察使下車益以廉  
公自持與僚屬言必咨民生利病課政之勤惰爲殿最  
而痛抑其奔競者治案牘恒至夜分不假手賓友嘗行  
金縣有司供張甚盛咎其僕而撤之公具奏請陞見既  
得旨以九月上道行至洛陽遘疾十月二十九日卒  
于寓舍春秋六十有六啟其橐無餘財故人子知洛陽  
縣張君映台實經紀其喪云公少以才名雄齊魯間登  
館閣二十年優游著作之林若將終身及

聖天子付以方岳之任正身率下事有利于官民者排  
羣議爲之一矯俗吏媵嬰骫靡之習天奪之年未竟其  
用要古所稱有守有爲者公實兼之世多訾儒生迂濶  
不通世務豈不謬哉公之學博而醇詩文皆有法度所  
著詩集八卷思永堂文稿四卷撰集山左詩百餘卷廣  
川詩鈔二十卷州乘餘聞二卷家故貧教授生徒自給  
既貴弟子著錄益衆分教庶吉士凡三科恒以師道自  
尊少所假借家居時巡撫白公鍾山延主灤源書院遠  
近負笈從之公教人爲文尚先正程式勿逐時好而取  
科第者轉多歲己卯大昕典試山左榜出書院生中式

者十有八人公喜甚貽以詩有云伊予久伏處馮軾觀  
羣閩決勝卜其長億占每幸中亦一時美譚也夫人劉  
氏賢而能治家先一歲卒子二人荔藻女三人以三十  
五年三月戊寅朔合葬于馮家砦祖塋之次先期公之  
長婿張子治致書乞銘公墓道之石大昕於公爲後進  
同在書局又同直講筵與公爲文字交有年故不敢辭  
銘曰

倚宋氏哲人繼漢司空唐太尉公之先潞長子徙安德  
今幾世學早成五經笥少所可寡所嗜老著作師後輩  
文章醇經濟備秦隴西國右臂撫吏民布威惠古爲徒

宦亦遂生也直視松檜鬱佳城長河裔其人存百千歲  
鎮守江南狼山總兵官左都督前提督廣西全  
省軍務總兵官許公神道碑

鎮守江南狼山鎮總兵官前廣西提督易州許公之葬  
其孤子宏猷清猷宣猷等旣請禮部侍郎倪公承寬爲  
銘納隧中復踵予門泣請文其神道之石子以內直無  
暇久不克爲而清猷等請益勤乃列公生平言行尤著  
者俾歸勒石以慰孝子之思公歛人也自曾祖榮祿公  
始徙保定之滿城後又徙易三世皆以公貴封贈階至  
一品公以乾隆元年登進士授



御前侍衛歷江西贛州左營遊擊廣信營參將廣東督標左營參將肇慶協城守副將調廣東督標中軍副將以太夫人憂去官服除補湖北黃州協副將擢鎮守江南壽春總兵官調江西南贛總兵官遷提督廣西全省總兵官以公事誼吏議當鐫級仍授江南狼山總兵官積階至榮祿大夫春秋六十有一終於通州官舍公數歷中外三十餘年精勤如一日文武僚屬皆推誠相與終始無間言視兵民一體未嘗以刻覈從事其在廣信遇歲旱米價翔踊民待賑者十室而九郡守適以事宅出知縣不敢任其事公遽以狀白行省出積穀數千斛

減價糶之民乃得安在肇慶日增城民王亮臣等聚衆謀逆公奉制府檄入藍分華峯諸山場搜洗巢穴皆駢首就擒無一漏網者公初莅贛州有威惠及總戎南贛兵伍間公至皆相戒曰勿欺許公粵西左控交趾右界滇黔蠻獠錯居瘴癘時作公巡歷兩鎮七協及諸土司關隘率兩歲而徧輕裝減從未嘗以供億滋累柳州駐節之所秋冬恒多火災公閱城廂內外多艸舍而兵士所處什居六七卽奏請支公庫生息銀假與兵士令各以陶瓦覆屋行之數年火患遂止公又以効力武舉難以得缺因與制府議計通省千把出五缺之後補用武

舉一人又以粵西距京遼遠部推武職到任動輒經年  
事多稽閣奏請照它省預保之例得

旨允行大兵之征緬甸也

詔粵西協濟戰馬先後凡二千餘匹公督率所屬具芻  
菱以次遞送又致火藥數萬斤並如期而至公又陳請  
赴永昌軍營自效

上以粵西要地資公彈壓

優詔不許公在狼山夏旱率屬步禱烈日中已而得雨  
盛暑親至海口呂四場閱水師戰船教以陣法竟以積  
勞成疾至不起嗚呼可謂勤于王事也已公事親孝方

在宿衛聞父榮祿公之訃一晝夜馳三百餘里至家號  
慟欲絕季弟蚤卒撫其孤如己出居鄉恭儉退讓嘗訪  
友郊外乘一騎一童子自隨見者不知爲貴人也其它  
敦交好義多有可稱述者不具書公諱成麟字瑞符號  
慶堂考存智祖考天霖曾祖考有倉皆未仕夫人同里  
崔氏生子二人國學生宏猷附貢生清猷側室畢孺人  
生子二人國學生宣猷徽猷女四人皆適士族孫二人  
元會保定府學生元愷曾孫一人其葬以某年月日銘  
曰

桓桓許公萬人俊敦詩說禮學自奮胸藏六韜演八陣

對策大廷科第進宿衛三殿恭以慎進止位不失尺寸  
宣力江右初啟軻分闢嶺外益有聞

帝眷優渥擢方鎮肘後常繫斗大印令肅千軍整鞞勒  
惠孚百城頌韶觀灘江清溪狼山峻紀公威德磨不磷  
服官千載篤忠蓋甲子甫周數何靳佳城鬱鬱松柏隱  
我文紀實可傳信

封資政大夫大理寺卿如十四級王公神道碑

大昕弱冠後卽從當代賢士大夫游竊取其緒論得粗  
知古人立言之旨其交最久而莫逆於心者則今大理  
寺卿王公昶也所居相距不百里嘗扁舟往訪升堂拜

母修子姓禮大理嘗語予曰吾先子志希古人不求聞  
譽于世每言孔門四科言語政事文學皆在德行之次  
顏子居陋巷終日不違如愚孔子獨贊其賢謂羣弟子  
莫能及漢黃叔度徐孺子管幼安皆終身隱約而行誼  
在三公之上蓋行之修者於人世文章功業有弗藉焉  
而富貴利祿更無足言矣大理又言某就傅後每夕先  
子輒授以通鑑事十數條次夕令覆講必精熟乃已又  
取古來名臣碩儒自屈子而下訖于明季凡百有二十  
人手錄其本傳俾誦習之題曰百世師錄某謹藏篋中  
月讀一過手澤尚如新也大昕既重大理之賢因是知

其淵源有自大理以進士 召試入官典司樞要出叅  
滇蜀軍事飛書艸檄出入矢石間者十載及愷施敘功  
進登九列以文臣 賜戴孔雀翎恭遇

孝聖憲皇后升祔禮成覃

恩誥贈其考資政大夫大理寺卿加十四級今春從

駕有事

秦東陵還朝乃上書陳情請假歸治先人窀穸事

天子嘉許即於二月奉太夫人還里門卜以七月壬辰

葬資政公于崑山縣之雪葭灣以元配陸夫人祔從先

人之兆也先期具書狀請大昕為文表於神道昔歐陽

子瀧岡之表自為之文大理今之歐陽子也乃不自為

而求之友者謙也中朝鉅公之能文者多矣獨求之家

居退閒之故交欲其可信也大昕雖不文其何可辭謹

按資政公諱子毅字鴻遠曾祖懋忠自浙江之蘭溪遷

於青浦城西十八里珠家角蓋在泖水之陽祖之輔考

璵皆以大理貴累贈至資政大夫公九歲而孤奉母沈

太夫人日必具酒肉自奉則取其最儉者伯兄出為人

後而貧不自給常分錢米遺之仲兄沒無後公歲時設

主祭必泣然流涕其治家有法婢子年十四五以上不

令侍左右既長貧不克贖者還其券而遺之里中無賴

子挾小嫌過門戟手罵遣人謝之弗與校好行善或授以功過格守之數年忽曰此道家言也儒者自有法乃擇六經語類而列之以爲謹身寡過之方其目十有二自是動中規矩行無瑕尤幾于古之不言而躬行者公卒於乾隆九年八月二十二日春秋六十四初贈文林郎內閣中書舍人加一級再贈奉直大夫吏部考功司主事加一級三贈至今官娶陸夫人後公 年歿春秋十有 初贈孺人再贈安人三贈夫人側室錢氏初封太孺人再封太安人三封太夫人有子一人卽大理公也孫女一適吳縣監生嚴榮銘曰

圓泖之水黜而深清沖然善下潤物無形允矣君子如水不竭潔匪近名虛能容物以古爲師與天爲徒環堵蕭然樂亦在吾德修于身克昌厥後

綸誥蜜章褒及祖考井椁旣卜樂哉斯邱鄉里聚觀車前八駟富貴匪榮文行是尚飲水知源百世是仰

詹事府詹事盧公神道碑

詹事盧公之葬也其孤孫達蔚不遠三千里踵子門求文志其墓又請爲文刻諸墓道之石某舉禮部試謬爲公所薦及登館職公又爲教習旣而同直講筵同列學士公嘗舉歐公與王禹玉事作詩見贈又嘗置酒召門

下士從容言身後之文當屬之錢生荏苒二十年公久歸道山而某亦衰病脫朝籍者數年矣言猶在耳其敢忘諸謹按公諱明楷字端臣晚年以鈍齋自號世居贛州之寧都縣今縣升爲州直隸江西行省故公爲州人田選拔貢生中順天鄉試授翰林院待詔登進士第改庶吉士授編修遷侍讀又遷侍講學士復左轉侍讀進右春坊右庶子復爲侍講學士此公之資歷也初入武英殿充校對後由纂修提調而至總裁官初入詞館協修記注尋爲日講起居注官由署而充在講幄十有四年嘗預刊修經史及律呂正義續文獻通攷昭忠

列傳皆爲纂修官主陝西河南兩省鄉試及順天武鄉試及同考會試總裁武會試教習庶吉士稽察右翼覺羅官學提督河南學政此公之差遣也諸館纂修官皆詞臣久次者爲之公以貢生校刊經史特與纂修諸公一體列名公爲庶常日遇慶典推封祖父同輩廕得從六品階公獨以前修書議敘加級得五品誥樂部向以諸王部院大臣兼領公在侍讀奉旨撰擬樂章特兼樂部行走其爲學士也適閣學多奉使在外卽命公直內閣代閣學批本此公之榮遇也公少而孤露苦志植學以成其名博習經史蘊釀爲文詞法度必準先民相

國蔣文恪公慕其名延致之凡經進賡和之作多屬公  
點定在詞館遇大典禮進賦頌輒爲諸公傳誦尤精於  
律呂清濁高下審辨不失絜黍所撰樂章播之管絃列  
於法部此公之文藝也公於制義鑒裁精審每入棘闈  
林膏校閱惟恐不及故所甄拔號稱得人在中州視學  
抑浮競崇實學所選拔士皆擇其名實相副者此公之  
鑒識也公和平樂易善戲不虐雖家人未嘗見其疾言  
遽色狀審于義利之辨苞苴之餽不至其門梯媒之語  
不入于耳家無長物而口不言貧尊師重友久要不忘  
旣沒而故交知舊多行哭失聲者此公之厚德也公生

于康熙四十一年九月八日終于乾隆三十一年八月  
十五日春秋六十有五其葬以乾隆四十七年十月二  
十六日夫人曹氏祔焉其世系子姓之詳則於墓志見  
之故不復書銘曰

金精翠微峨峨百丈是生偉人儀觀雋朗囊括百氏擷  
其菁華大放厥詞而法而葩有司拔尤升之太學遂直  
內殿經史分校律呂之編公與攷稽荀阮房范宿悟  
與齊迺舉京兆待詔禁苑擢第南宮載登三館螭頭侍  
直職在記言曲江風度中朝聚觀再踐學士論思清切  
出持冰鑑入趨瑣闥

天子有命汝長宮僚文學侍從班資最高公今已逝公  
名不沒茶山之詩容齋之筆陽都城南鬱朕新阡達者  
有後相爾嗣孫

宗人府丞曹公神道碑

宗人府府丞汾陽曹公學閔之葬禮部侍郎朱公珪既  
為銘其藏而公子錫齡祝齡復遺書請予文其麗牲之  
石予與公同登進士久而以道義相取譬諸艸木臭味  
無差池也公又嘗稱予文以為有法述德感舊後歿者  
之責其何敢辭謹按公字孝如號慕堂曾大父復琦大  
父應璽父曰英皆以公貴贈中議大夫太僕寺少卿加

一級公幼孤勤苦自立舉辛酉科鄉試甲戌成進士改  
翰林院庶吉士在館六年授檢討即充 武英殿纂修  
官以院長奏入院辦事改補河南南道監察御史是時準  
噶爾回部初入版圖公奏請增修 大清一統志以昭

本朝畏懷之盛有 詔允行轉刑科給事中又轉吏

科掌印給事中會三輔亢旱公奏請清理刑獄將朝審

三次緩決人犯減等發落即日 召見下 詔施行公

在臺垣八年所陳奏皆有關 朝廷掌故及於民生吏

治有裨益者累擢鴻臚寺少卿光祿寺少卿通政司參

議太僕寺少卿初公在給事言會試舉人宜徑由州縣



出結送部以防展轉需索事下禮部議格及是復奏申前說 上以卿寺無言事之責且近明季爭辯陋習

下部議降三級用頃之復補鴻臚寺少卿扈 蹕熱河

召見詢歷官本末甚悉尋遷內閣侍讀學士會

天子勅建辟雍告成將行臨雍禮而公昔於御史時曾

以此事入告 上憶公前奏 特旨嘉獎令吏部於

應陞缺出請 旨擢用明年正月 詔於 乾清宮

賜千叟宴公年六十有七得預有 御製詩刻及鳩杖

文綺之賜尋擢宗人府府丞稽察覺羅右翼宗學九寺

列卿惟宗丞班次最高公由學士躡次得之實異數也

公體素羸弱中歲得導養術神氣完固而素不耐寒噉

逆時作遂有止足之志是歲十月陳請解任 詔以元

官致仕公性耽山水未第時往來吳越縱游東南諸名

勝及登仕籍三十餘年公事之暇輒與三四知己出國

門游賞如潭柘戒壇祕魔屋香界寺往往流連信宿或

策蹇行冰雪中觀者以爲神仙中人治家質素金玉玩

好之具不陳于側午後輒掃地焚香觀心調息超然有

塵外之想生平不臧否人物而胸中界限分明嘗曰人

各有所偏但當棄短取長否則無一人可交矣詩文皆

攄寫性情不事藻飾晚年課子讀書尤以浮華馳逐爲


戒故諸子咸以文學自奮公雖移疾脫朝簿而長子方  
官詞垣侍養如意公既樂而安之因令次子旋里營菟  
裘爲終老計旣而喘嗽加劇以乾隆五十有二年十二  
月八日終於京邸春秋六十有九夫人任氏丁酉科武  
舉宗讚之女長子錫齡乙未進士翰林院編修次祝齡  
己酉恩科進士戶部額外主事孫八人汝淳汝瀾汝  
淵汝沆汝洵汝涵汝藻汝淳孫女五人公學行誠篤未  
嘗躐許求名而居家莅職清慎無玷當代名流咸慕與  
之交而介然不可干以私在都下時正陽門外失火延  
燒數千百間鄰里焦燬殆盡獨公屋巋然無恙人以爲

厚德之報云銘曰

宗正之司總以維藩丞哉其貳三品崇班堂堂曹公樂  
易坦白木天瀛洲柏臺梧掖敷歷五寺遂陟宗卿介不  
絕俗直非近名公有封事

天子嘉只公旋引疾

天子俞只知止不殆老氏所云葆真恬憒以養谷神憶  
同唱第二百四十唯公與我氣同志合聞義相告有過  
亦規四海元伯千秋鍾期恒翰雖辭令譽長在馬蕭是  
封過者下拜



潛研堂文集卷四十一

門人袁廷禱校字

潛研堂文集卷四十二

嘉定錢大昕

墓志銘一

巡撫福建兵部右侍郎都察院右副都御史前  
太子少保協辦大學士刑部尚書莊公墓志銘

上御極之四年

詔以廷試進士撰擬頌聯獻諛非體且啓請託之弊  
命大臣集議制策當取通達治體以漢鼂錯董仲舒唐  
劉蕡宋蘇軾爲式於是番禺莊公以第一甲第一人登  
第讀卷日拆號得公名

天顏喜甚引 見授翰林院修撰入直 南書房越三年公弟有信成進士引 見公適以起居注官侍直 上顧問公遂得選庚吉士其冬兄弟同請告歸省海內 傳爲盛事假滿還朝遷右春坊右中允進翰林院侍講 遷侍講學士擢光祿寺卿丁資政公憂卽家拜內閣學 士服闋入都遷兵部右侍郎提督江蘇學政轉戶部右 侍郎 召還供職尋充江南正考官再視學江蘇卽 除江蘇巡撫莅事六載丁太夫人艱扶櫬南行有 詔擢江南河道總督以居憂未之任坐在蘇日罰贖事 失當逮繫法司論如律

詔特賞罪令護喪還籍後赴軍臺自効方蒞謫所中途 卽授湖北巡撫歲餘仍調江蘇巡撫未行復調浙江巡 撫莅事四載復調江蘇加太子少保逾年擢刑部尙書 協辦大學士仍留辦巡撫事乙酉冬入都供職未幾坐 劾段成功事逮問頌繫半載有餘復授福建巡撫乾隆 三十二年七月二日寢疾終於福州官署享年五十有 五公以文學侍從之臣荷

聖天子深知出膺節鎮誓以清勤自勵初在江蘇晝接 見僚屬夜治文書或至漏盡不少休癸酉夏秋之交淮 揚諸郡水公親往察勘撫卹得

旨截漕百廿萬石出帑銀五百萬兩以備振濟民乃得  
蘇乙亥太江南北復以災告公草奏自言奉職無狀數  
干天和并陳諸揀荒之策

上皆允行所費內府白金凡千餘萬督率屬吏檢視給  
散胥役不得侵漁明年夏民多病疫公首捐俸錢令有  
司察民病者予藥死者予糈并檄管內推其法行之湖  
北督撫並駐武昌公事往往齟齬公在楚歲餘與總督  
碩公和衷共濟始終無間人以爲難及撫浙之始浙西  
三郡以風雨蟲傷米價騰踊而江南亦歉商販不至公  
奏請動司庫銀三十六萬委官往湖廣採買有

旨命甯湖南漕米十五萬石并碾倉米五萬石運浙糶  
濟富戶知楚米將至價不得踊米亦漸出而自冬徂春  
米之來自楚者舳舻相望分撥諸郡減直以售歲雖儉  
而民不饑矣錢唐江入海之處有三壘曰南大壘曰中  
小壘曰北大壘乙丑以後水行中壘者十餘年己卯歲  
收趨北大壘公承

詔抵海寧閱柴石塘登尖山渡江周遭履勘首以購芻  
薪加築土堰添建坦水爲請旣而水勢直齧塘根以預  
備得無患又奏復海塘兵專司負薪運土甃石下椿設  
守備一員千把外委十二員分界防守省民夫無算海

寧之老鹽倉向以土活沙浮祇立柴塘壬午歲

聖駕南巡議改石塘

命相國劉文正公統勲今相國高公晉與公先往察勘  
果以活沙不能立椿

上復親歷隄上指示形勢令修柴塘增坦水加薪價公  
承

命鳩工庀材尅期戴事又用前人竹絡之法編竹爲簾  
寔以巨石鱗次櫛比以衛塘根其秋風潮大作石塘間  
有崩裂而柴塘獨無恙公之力也是時秋霖之後水漲  
久不退公親往嘉湖兩郡察勘知水歸太湖之道多淤

而太湖下流亦多壅闕因請浚烏程長興境內七十二  
澗并遣官至江南按行三江故道疏入尋有改撫江蘇  
之

命公遂親往探尋脈絡得其要領建議大修三江水利  
具摺入告其畧云太湖北受荆溪百瀆南受天目諸山  
之水爲吳中巨浸而分疏之大幹則以三江爲要三江  
者吳淞江婁江東江也東江自宋已湮明永樂間別開  
黃浦寬廣足當三江之一今亦謂之東江三江分流經  
吳江震澤吳元和崑山新陽青浦華亭上海太倉鎮洋  
嘉定十二州縣之境其間港浦縱橫湖蕩參錯大概觀

之無處不可分洩似亦可安於無事然百節之通不敵一節之塞數港之洩不及一江之壅其勢必有所阻查太湖出水之口不特寶帶橋一處如吳江之十八港十七橋吳縣之鮎魚口大缺口爲湖水穿運河入江之要道今亦不無淺阻又如人吳淞之龍山湖大斜港九里湖澱山湖澱浦向稱寬深足資宣洩者爾來小民貪利徧植菱蘆圍築魚蕩亦多侵占劉河古之婁江也今河形大非昔比舟楫來往必艤舟待潮崑山外濠爲婁江正道淺狹特甚蘇州之婁門外江面僅寬四五丈偶遇秋霖衆水滙集江身淺窄先爲潦水所占俟其消退然

後湖水得出爲之傳送而上游已漫淹矣東南財賦重地水利民生大計若及早治之事半而功實倍今籌所以治之之法當於運河以西凡太湖出水之口皆爲清釐占塞俾分流無阻其運河以東三江故道惟黃浦見在深通但於泖口挑去新漲蘆墩三處足資宣洩其吳淞江自麗山湖以下婁江自婁門以下凡有淺狹阻滯之處宜濬治寬深令上源所洩之數足相容納其江身所有植蘆插蘆及冒占之區盡數剷除嗣後仍嚴爲之禁則水之停蓄有所傳送以時並卽以挑河之土加培圩岸見有牯座去海太近難於啓閉者酌量改移庶渾

潮不入清水盛強而海口之淤亦將不挑而自去總計  
所需雖覺浩繁然散在十二州縣通力合作寔亦無多  
民間聞有此舉咸樂趨事願以民力爲之但分段督修  
仍須官董其成且工費繁多若待鳩集財力而後興工  
不無稍稽時日仰懇

聖恩准于公項內先行勦支興工仍於各州縣分年按  
畝徵還則民力旣紓工可速集奏入報可於是選紳耆  
賦工役先疏橋港次及河身菱蘆魚蕩之圈占者除之  
城市民居之不可毀者別開月河以導之工始于癸未  
之十二月至甲申三月告成凡用白金廿二萬有奇公

再撫蘇有

旨仍兼管浙江海塘先後增築魚鱗石塘凡若干丈松  
江太倉沿海亦有石塘而土塘居什之八九公請如浙  
塘之法編竹簍實石護塘根以禦海潮公之盡心于水  
利海塘其大者如此其撫福建也預誡族人居晉江者  
勿至省卽至遣門者謝之曰我爲封疆大臣嫌疑當避  
且俟去此之日再相見今則不敢也洎公之薨晉江宗  
人始來會哭咸稱公之公正爲不可及維公奮跡嶺海  
以文學登巍科不及十年而躋九列貳六卿皆  
聖明親擢不由薦援



清石堂文集 卷四十二  
天子察公識度闕遠材任公輔東南重地膺委寄者十有餘年入領尚書遂參大政中間兩遭顛躓賴

天子仁聖終保全之重建節旄恩禮罔替天不假年未臻中壽然海內士夫識與不識聞公名靡不歎羨謂科目得人之盛也嗚呼休哉公生而穎異少爲諸生試輒冠其曹偶好吟詠日有程課書法圓勁出入顏平原趙吳興之間片楮隻字人爭藏弄以爲榮在禁林日經進詩文數被獎賞及

車駕省方公以方岳大臣扈從輒命賡和

御製詩篇

上幸嘉興之煙雨樓

特召公至行營給札聯句詩成書以勒石羣臣莫及焉公諱有恭字容可號滋圃先世爲晉江望族父資政公始徙居粵今爲番禺縣人曾祖某祖某父奕仁皆以公貴贈資政大夫江蘇巡撫夫人楊氏某公之女子一士斌國子監生女二附貢生何文通壬午舉人龍川縣教諭羅永楠其婿也公沒後九年公子士斌卜窆窆於某鄉之原以某月日葬先期屬大昕爲銘大昕久從公遊今奉使嶺南又得會公之葬奚敢以不文辭銘曰

九曜降精生傑人驂驅得路鸞鳳齋讀書百篇筆有神

大廷對策陳萬言龍頭首擢侍從班文章經濟夙抱全  
全手持玉尺分判均三吳善類推獎勤

帝曰汝諧撫吾民百城保障氣若春水旱拯恤無因循  
清波可活涸轍鱗築塘捍海止石堅或編竹絡槩菱薪  
震澤底定三江分原委脉絡細討論尾閭勿壅流云云  
惠流越角兼吳根出乘八騶擁節幡入長六曹參絲綸  
平生温飽志不紛盤錯歷盡能自完封川莫南海倫瓊  
山邱江門陳科名事功相後先惟公兼之在一身崇岡  
鬱鬱宰木繁千秋萬歲名不湮

光祿大夫 經筵講官太子太保刑部尚書秦

文恭公墓志銘

太子太保尚書秦公以經術篤行知名海內起家詞苑  
官登極品歲甲申四月以疾請解任 温旨不許八月  
復具疏乞回籍調治 詔允所請仍懸缺以待公既受  
命買舟南下疾遂革以九月九日巳時薨于滄州計聞  
天子軫惻賜白金千兩庀喪具令有司議卹典祭葬  
如制謚曰文恭明年春 車駕南巡至無錫 幸寄暢  
園 御製詩有養痾旋里人何在撫景愀然是此間之  
句寄暢園者公家別業也 上追念舊臣形于翰墨如  
此公可以不朽矣其九月孤子編修泰鈞等將葬公于

某原先期遣一介走京師述公遺言請大昕為文誌其墓大昕于公為年家子又嘗主公邸第日月不居知己云逝文雖不工其何敢辭謹按公諱蕙田字樹峯號味經宋贈龍圖閣直學士觀之二十六世孫世居無錫為右族雍正初析無錫置金匱縣故公為金匱人曾祖考德澄祖考松齡順治乙未進士 日講官起居注左春坊左諭德考易然常州府學生妣顧氏本生考道然康熙己丑進士 日講官起居注翰林院編修改禮科給事中妣徐氏胡氏生母浦氏三世皆以公貴贈光祿大夫刑部尚書妣皆一品太夫人公以乾隆元年 賜進

士第三人及第授翰林院編修入直 南書房丁浦太夫人憂服闋補原官教讀 上書房遷侍講進右春坊右庶子改通政使司右通政擢內閣學士遷禮部右侍郎丁給諫公憂服闋補禮部左侍郎調刑部右侍郎轉左侍郎兼理國子監算學充 經筵講官擢工部尚書兼理樂部調刑部尚書加太子太保累階至光祿大夫公至性過人方未遇時給諫公以藩邸事牽連頌繫十餘年間檻車南北炎雨悲風吏卒雜前公隨侍膝下百方營護夜分就寢流涕交頤然不令給諫公知之及通籍之始朝廷赦書屢下給諫公猶不得援例寬釋公以

新進詞臣輒伏闕陳情乞以身贖其畧云臣本生父某身罹重罪已荷天恩曲宥祇因催追銀兩力不能完仍行圈禁迄今九載年已八十衰朽不堪本年五六月內侵染暑濕癰癘時作寒熱交攻奄奄一息幾至瘞斃羈所情關骨肉痛楚難忍臣雖備員禁近而還顧臣父老病拘幽既無完解之期更無久存之望方寸昏迷不能自主誠不忍昧心竊祿內慙名教伏惟皇上矜愍庶獄有一綫可原者概予寬釋當此聖明孝治之朝更逢薄海祝網之日惟有顛懇鴻慈格外鑒宥丐臣父八旬垂死之年得以終老牖下臣願革去職銜効力

奔走以贖父罪奏入天語嘉歎遂有寬釋之詔而未完之銀亦併豁免由是給諫公優游林下者又十年公受詔感泣誓以身許國而上亦鑒公忠孝有大用公之志矣公在學士時陳科舉學校大事在禮部練習掌故夙夜匪懈在刑部執法平允尤爲上所倚重同僚或持異議公援引律例必如所擬乃已遇司屬嘖笑不苟其以才能見者則薦引之不遺餘力衆莫不憚其嚴而服其公也公歿之後部中讞獄偶不當上輒舉公名歎惜不置以是知公之盡心于職矣公立朝三十年治事以勤奉上以敬剛介自守不曲意徇物公

退則杜門謝賓客者書不異爲諸生時後進有通經嗜古者獎借不去口蓋天性然也公幼而穎悟及長從給諫公于京邸何此瞻王若林徐壇長諸先生咸折輩行與之交中歲居里門與蔡宸錫吳大年尊彝龔繩中爲讀經之會嘗慨禮經名物制度諸儒詮解互異鮮能會通其說故于郊社宗廟宮室衣服之類尤究心焉上御極之初江陰楊文定公領國子監事薦公篤志經術可佐教成均旣而直內廷課皇子講讀益以經術爲後學宗嘗言儒者舍經以談道非道也離經以求學非學也故以窮經爲主而不居講學之名生平所爲文號

味經高類稿者凡若干卷而說經之文居其大半公夙精三禮之學及佐秩宗攷古今禮制因革以爲禮自秦火而後漢儒保殘守缺什厯存一朱子生于南宋嘗有志編次朝廷公卿大夫士民禮爲當代之典而所撰儀禮經傳通解體例未備喪祭禮又續自黃氏楊氏未克竟朱子之志迺按周官吉凶軍賓嘉之目撰爲五禮通考二百六十二卷先經後史各以類別凡先儒所聚訟者一一疏其脉絡破其癥結上探古人制作之原下不違當代之法殫思二十餘年彙易三四而後定自言生平精力盡于是焉少喜談易謂易者象也先儒詳于言理

略于言象故撰周易象義日箋若干卷又謂詩三百篇  
古人皆被之管絃漢魏以降始失其傳然天籟之發今  
猶古也因與同志講求欲以今曲歌古詩度協詩樂合  
一之旨又以近代聲韻之書未有善本奏請刊正上  
命公與武進劉公任其事公建議言古韻二百六部今  
併爲一百七韻如元與魂痕當析爲二般韻宜併入真  
韻不當入文韻上聲拯韻去聲證韻宜分出各自爲韻  
又攷定四聲表兼采崑山顧氏婺源江氏之說欲通古  
音于等韻時公已邁疾而徃復辨論猶斷斷不置也公  
之著述其大者如此若夫律呂算數以及醫方堪輿星

命家言皆泝流窮源得其要領雖專門名家者亦歎以  
爲莫及嗚呼可謂有體有用者已公生于康熙壬午十  
月十九日歿時年六十有三夫人侯氏太學生某之女  
封一品夫人子四人長泰鈞乾隆甲戌進士翰林院編  
修次復鈞長錫次鼎鈞太學生次上鈞女二人長適雲  
南劍川州知州嵇承豫孫男二人沐日沐恩孫女六人  
銘曰

西神戔戔二泉窾造物鍾英生偉人雙孝之澤流十世  
啟佑祖考清華繼惟公至行爲士宗歷艱而亨純孝通  
明刑十載邦憲司三刺三省公無私斯人一去難再得

澤石堂文集 卷四十二  
同朝盡傷 至尊惜政事文學一身兼沒而言立公何  
慙城西新阡卜云吉千秋識之字不滅

詹事府詹事盧公墓誌銘

詹事府詹事兼翰林院侍讀學士寧都盧公以乾隆三十一年八月十五日終於京邸春秋六十有五子立瀛立淇扶櫬歸里越十有七年兩公子亦先後下世矣諸孫等始卜十月二十六日葬公於州城南第一橋之新阡公嘗買彭氏故園爲讀書之館至是撤其館而爲兆域焉以公之樂斯邱也先期次孫達蔚踵門來求文志公墓大昕公門下士知公最深其何忍辭乃泣而序之

曰昔錢文僖公言朝廷之官雖宰相之重皆可雜以它才惟翰林學士非文章不可歐陽文忠公嘗亟稱之公以閱覽博物起家翰林待詔由館職登學士陟宮尹立朝二十餘年無一日離文字之職入侍講幄出司文衡朝廷大著作輒預撰述非老于文學安能上結

主知若此哉公初以諸生選拔入成均選充 武英殿校對會

詔刊正十三經廿二史諸總裁言公學問周洽警勸精審遂得與纂修之列纂修官皆詞臣爲之公以貢生預焉蓋異數也和碩莊親王尙書張文敏公受

海石室文集卷四十二  
詔編次律呂正義又薦公爲纂修官張公嘗語人曰盧君妙解律呂當今之蔡中郎阮仲容也尋舉順天鄉試試授翰林院待詔辛未歲成進士改庶吉士卽充武英殿纂修官明年散館授編修又明年典陝西鄉試又明年充會試同考官分教庶吉士轉武英殿提調官充日講起居注官又明年遷侍讀又明年擢侍講學士又明年協辦內閣學士批本事務充武會試副總裁官遂爲武英殿總裁官又明年左遷侍讀又明年典河南鄉試時同受命者侍讀學士朱公珪階資皆在公前而轉爲公副其冬和碩莊親王等奏公兼樂部行

走撰擬樂章樂部皆部院大臣兼之公以五品詞臣廁其間尤異數也又明年遷右春坊右庶子典順天武鄉試又明年復爲侍講學士又明年提督河南學政閱三載任滿還朝其明年三月擢詹事公年五十始登第登第後無歲不霑恩渥位躋三品駸駸柄用而遽以積勞致不起悲夫詹事古稱官相今則職務清簡而特爲詞臣最高之班由侍從擢卿貳者徃徃踐歷此職不久卽遷去其文學尤異

上意方鄉用而旋終于此者三十年間惟嘉定張公鵬翀及公兩人此海內所深惜也公博涉羣書不名一家



詩文春容和雅無粗厲抑塞之習屢主文柄抑奔競崇實學所甄拔多知名之士於樂律易卜尤極敏悟嘗依焦氏易林言人休咎多奇中雖專門弗逮公接物甚和而持身嚴正輕財尚義不爲家人生計初入都張文敏公蔣文恪公皆器重公引爲上客終未嘗少干以私同邑宋嗣南公受業師也旣歿數分金遺其孤及視學河南解內猶爲宋設位朝夕拜之王進士龍篆客歿都下葬西便門外公爲立享堂祭座每寒食輒往拜其墓其篤于故舊多此類公諱明楷字端臣號鈍齋世居江西寧都州大父不瑕公贈奉直大夫父式夏公贈中憲大

夫夫人曹氏榮祿大夫左都督廣東三江協副將凱伯公之女生于貴家而能屏華綺事親相夫皆中禮法先公八年卒 誥贈恭人子立瀛壬午舉人立淇丙子舉人江蘇布政司庫大使立沅有至行母沒慟哭九十五日不食而歿州人所稱盧孝子也女二人孫男五人達荀州學生達蔚今更名嗣智國子監生達蓮達燕達□孫女若干人曾孫若干人銘曰  
德可以潤身文足以經世其鼓篋橋門也祭酒詁爲異人其簪筆內殿也

至尊許爲才子登記言之內史兼批勅之學士詹事之

長視古承旨方謂陟八座而贊黃扉兮胡爲夢陰堂之  
講而遽止此也日涉之園先生藏焉千秋而後想見其  
軼鄒枚而追虞揭也

工部左侍郎汪公墓誌銘

乾隆四十有八年夏六月十有九日工部左侍郎持齋  
汪公卒春秋六十有六公素康強無疾是日黎明猶偕  
諸大臣入朝啟事畢入署釐務如常還寓猶手一編  
初昏就寢少選呼之不應則已逝矣公之將誕也祖榮  
祿公夢紫衣僧持錫杖求宿及生狀貌如夢觀其世化  
之際豈所謂夙根不昧得大自在者耶孤子編修學金

扶欄南旋以明年某月日葬公於州城北二十四都琅  
港之原屬大昕爲文誌公之墓大昕初入館公已爲學  
士公忘分引進之嗣後講筵書幄皆獲隨公步武又同  
居西苑 賜園有年知公行事爲詳謹案公諱廷璵字  
衡玉別號持齋世爲新安右族四世祖始徙太倉後析  
州爲縣始占籍鎮洋焉曾祖壽堯祖溥父之恒種德蘊  
素積厚而光以公貴累 贈榮祿大夫妣皆一品夫人  
幼而穎悟初補博士弟子員學使桐城張公廷璐奇其  
文曰它日名位不在吾下公初名璿張公易以今名且  
加廷字欲引爲昆弟行也辛酉舉鄉試丁卯考充 咸

安官教習試卷進呈 欽定第一人並 諭閱卷大臣  
日來科會元得如此文可矣戊辰會試中式 殿試讀  
卷日公名在第五 天子親擢第三人及第授翰林院  
編修卽充舍典續文獻通考兩館纂修官庚午充河南  
鄉試正考官辛未散館 御試一等壬申春 特開鄉  
會恩科充湖南正考官復 命甫踰月 御試翰詹諸  
臣于 正大光明殿以納涼賦爲題作者多規撫上林  
子虛鋪陳宮殿苑囿公獨以 宵旰憂勤民事立言  
特擢一等一名超授侍講學士充 日講起居注官又  
充會試同考官又充武會試副總裁官一歲之中 恩

命頻仍而公益以銳進爲思持重謙抑無幾微矜炫意  
癸酉充福建正考官事畢請假歸省二親尋奉 命督  
學福建公訪知閩省多項旨之弊由於童生衆多一縣  
或考數場遂有一人重疊與考以啟弊混公檄令每郡  
添建考棚併爲一場考之夜分卽起點名稽察嚴密此  
弊遂革丙子丁艱回籍已卯服闋入都再奉督學福建  
之 命時公需次補缺未與聞列卽承 簡用尋補侍  
讀學士讀學班在講學之右惟見任得轉補公以候缺  
得之亦 異數也時功令初用詩帖生童狃于土音尠  
諧律度公親爲講究聲病由是能詩者漸衆壬午冬任

滿還 朝癸未 御試翰詹公列二等一名特賜文綺  
二端尋擢少詹事甲申入直 上書房侍 皇六子講  
席公謹慎嚴肅非禮不動開陳經義詞遠意周是冬  
賜紫貂裘一襲每歲終賜 御書福字及鹿尾黃羊冰  
魚文雉諸物首歲 曲宴重華宮賡和 天章則有如  
意端硯之 賜端午則有紗葛宮扇香囊立春進帖子  
則有絹紙湖筆硃墨 錫賚便蕃歲以為例乙酉充湖  
北正考官丙戌遷詹事再遷內閣學士兼禮部侍郎戊  
子奉 命督學江西辛卯還 朝壬辰充會試副總裁  
官放榜後復高門閱墨卷備取中書學正若干名所甄

拔率多績學之士甲午教習庶吉士丙申以金川平定  
奉 命之山東江南浙江祭告嶽鎮及先代陵寢禮成  
請假歸省時胡太夫人年逾八十神明不衰公衣錦稱  
觴門外列八騶鄉間稱為盛事丁酉充江西正考官未  
撤闈又奉督學順天之 命三輔密邇輦下歲時得與  
朝賀公屢蒙 召對暇日仍至 上書房戊戌擢工部  
右侍郎仍留學政之任時承德府初建 文廟兼設考  
棚公於 大駕避暑前趨往考試畢率生徒迎 駕翼  
日隨 駕詣 文廟行釋奠禮特被官紗文綺之 賜  
熱河士子鄉試另編字號自此始其冬丁胡太夫人艱

戴星南奔喪葬盡禮辛丑公子編修君登進士與公甲第恰同稽諸故事四百年來惟王文肅公與子緝山兩世皆第二人登第科名盛事均在吾州海內所未有公在里門對賀容不色喜寓書編修勛以敦品飭行無忝科名未嘗稍有夸耀也壬寅入都仍署工部左侍郎直上書房兼四庫全書總閱癸卯奉命如盛京恭送冊寶方諏吉啟行而公已長逝矣公平生持躬以謙接物以誠治家以儉服官以勤無輿馬服玩之好無絲竹讌遊之樂風度凝重言笑不苟自登上第歷官卿貳皆九重親擢不由援引向來翰詹御試首選不三

四年已陟八座公爲學士十餘年再試優等始得序遷其安於平進如此久直禁近小心慎密退食之暇校勘圖史蕭然如諸生時性不妄交卽素相知形迹亦落落嘗曰聖人稱善交必日久敬燕昵詭浪交道之媿也爲文以典重條暢爲主不蹈纖穠艱澀之習主持文柄幾無虛歲同朝莫能及焉公初娶凌夫人文學□□之女繼娶王夫人壬戌進士兵部郎中廬州府知府成之女賢明善治家公得一心奉公無內顧憂者繫夫人之力子一人卽編修君由庚寅恩科舉人授內閣中書協辦侍讀事辛丑進士及第授翰林院編修充四庫全書

分校議敘遇缺開列先用女三人長許字項侑旣早卒  
次適顧增光季適錢東璧大昕長男也孫二人彥博甲  
辰召試欽賜舉人內閣中書彥國縣學生孫女一  
適陸受秩銘曰  
泰山北斗衆所尊景星卿雲爲世珍維公巨手燕許倫  
宵羅三倉二酉文筆落堯典生民篇巍科直上鰲峯顛  
讀書中祕譽益振九天給札集衆仙揮灑千言日未  
曛御筆親擢第一人嘉爾規頌思不羣學士峻擢吳  
命申校文棘闈玉尺掄先民主臬分判循其於視學尤  
精勤三物六行誨之諄屏除譁囂還樸淳虎闈人直尊

所聞規行矩步禮法遵經師人師并一身桓榮稽古榮  
則均宮端進秩參閣綸四庫甲乙預討論三館吉士教  
育殷冬官作貳卿月新程功執度法不愆廿載內直温  
樹春一條冰樣頭銜勻玉堂才子宮花鮮科名接武嘉  
話傳年過六十髮未宣忽焉解脫返自然不朽何必非  
千年琅港之水九曲蟠宰木鬱然吉且安昔聞下馬董  
相墳誰其嗣之平陽阡

太子太保兵部尙書湖廣總督世襲二等輕車

都尉畢公墓誌銘

嘉慶二年秋七月庚午兵部尙書湖廣總督世襲輕車

都尉鎮洋畢公以疾終於辰陽行館公久在行間勛勞  
懋著及移駐楚南籌畫善後之策苗境收寧

上聞公積勞邁疾手足不仁卽馳賜上藥諭以安

心調攝公自念受恩深重且當三楚多事不敢以私

誤公力疾視事有加無瘳遂致不起遺疏入告九重

軫恤加贈太子太保諭祭如禮文通武達生榮死

哀可謂令德考終也已諸孤奉公匱歸吳門里第越明

年三月十有八日卜新阡於吳縣靈巖鄉上沙里以元

配汪夫人祔禮也大昕與公同里閨先後入館閣論文

道古數共晨夕晚歲雖雲泥分隔而公不忘久要書問

屢至每有撰述必先寄示茲請孤述遺言請文刻諸貞

石大昕泣然不敢辭按狀公諱沅字襍蘅一字秋帆自

号靈巖山人先世居徽之休寧明季避地蘇之崑山又

徙太倉州後析置鎮洋縣遂占籍焉曾大父泰來公大

父見峯公父素庵公皆厚德敦行識者謂其後必大公

自少穎悟甫六歲母張太夫人手授毛詩離騷過目卽

成誦十歲審聲韻十二習制舉義十五能詩稍長讀書

靈巖山從沈文愨公德潛惠徵君棟游學業益遂弱冠

後游京師乾隆十八年中順天鄉試又四年授內閣中

書大學士傅文忠公一見器重卽令入直軍機處公練

習掌故治事識大體樞庭諸公咸以公輔期之二十五年會試中式名在第二及廷對纚纚數千言議論剴切

上親擢第一是歲始定新進士前十名於讀卷日引

見公儀觀秀偉進止有度天顏甚喜臚唱授翰林院

修撰館中經進文字多出公手皆典重有體遷右春坊

右中允再遷翰林院侍讀充日講起居注官轉左春坊

左庶子三十二年

上親耕耜田御觀稼臺公侍直奏對稱旨宣示

御製詩給筆札令賡和詩成進覽稱善是冬授甘

肅鞏秦階道召見諭曰汝軍機舊屬達於政治不

徒文學優長也到官卽畱辦新疆經費局又從總督出

嘉峪關察勘屯田自本壘河至吉木薩往返數萬里途

中多紀行詠古之篇尋調安肅道三十六年擢陝西按

察使入覲具言甘肅頻年苦旱狀有旨諭督臣加

意賑卹并免積欠四百萬兩尋擢陝西布政使兼護巡

撫印務時大兵征金川由陝入蜀公督理臺站饋餉

充足三十八年河渭洛三水溢入朝邑界公馳往分別

賑卹全活甚衆擢陝西巡撫歲旱禱太白山得甘雨清

理八旗及提標馬厰空地募民開墾納賦爲賞卹之用



又奏修西嶽廟及元聖周公墓訪其後裔置五經博士一人以奉祀事濬涇陽龍洞渠在陝六載兼署西安將軍者再署陝甘總督者一特賜戴孔雀翎恩遇之隆漢大臣莫及焉丁張太夫人艱甫及一年上以陝西任重復起公署巡撫事會甘肅回賊陷河州逼蘭州城公檄調滿漢兵先後赴援又請簡八旗勁旅令大臣總統援應及事平上曰畢某在陝西聞甘省逆賊滋事卽能悉心調度事事妥協並有先辦而與朕旨相合者實屬可嘉著賞給一品頂帶其後平涼逆回復倡亂攻掠通渭靜寧驛道梗塞公復調兵助剿又分兵出關

道繞其後俾不得他竄公之盡心國事不分畛域多此類也五十年調河南巡撫是時河南北頻年苦旱而河水泛溢壞民田廬舍公旣受命卽奏請截畱漕運以平市價諸州縣被災戶展賑兩月其徵收未完銀米視被災分數或全免或緩徵俱得允行自後積水漸消禱雨輒應歲獲豐稔又奉命詣桐柏山求淮源公躬履嶄崑尋其脉絡繪圖以進特蒙嘉獎御製淮源記述其事尋賞穿黃馬褂擢湖廣總督未行以伊陽拒捕案被議仍留巡撫任五十二年河決睢州溢寧陵商邱永城鹿邑柘城諸縣詔大學士阿文成公臨視會

同等畫自夏迄冬凡五閱月而歲事撫卹灾黎蠲緩借種全活無算明年河北三郡早遵 旨撥運米麥減價平糶又濬治百泉丹河九道堰引水溉田尋授湖廣總督時江水異漲溢入荊州城下游州縣亦多淹沒訪得江心有害金洲阻塞水道爲上游之害亟命拔去蘆葦居民毋得占據仍於北岸築堤逼溜南趨以資保護賑卹被淹人戶城垣堤岸衙署兵房次第修葺又革除鹽課陋規禁絕私販每歲溢銷十數萬引五十九年入覲天津 行在賜 御製詩隨於幄次賡和自陳早衰多病乞京職自效 溫諭不允是秋以湖北姦民傳教

案左遷山東巡撫臨清館陶諸州縣被水遵 旨加兩倍賑卹豁免秋糧及本年漕米委員於豐收處糶糧食存貯以備來歲平糶六十年春 恩詔普免各省民欠公查出東省節年所欠正耗銀四百八十七萬有奇常平社倉米穀五十萬有奇咸 奏除之時已得再任湖督之 命拜奏而後行其勇於任事無遷延顧望如此初入楚境聞苗疆有警卽馳赴常德籌畫轉餉旣而大學士嘉勇公福公四川總督和公先後到楚檄調六省兵會勦供支日不下數萬公移駐辰州督運軍儲輸將相繼 大兵旣擒首逆吳半生等乾州永順永綏保靖

諸苗五百餘寨先後詣辰乞降公承 詔撫諭咸感泣叩頭而去嘉慶元年春湖北枝江賊起詭稱白蓮教而宜都長陽長樂教匪一時應和四出焚掠公馳赴枝江與巡撫惠公調兵進剿連破蕭家巖栗子山長嶺沖諸寨時北省標營兵皆調赴苗疆姦民乘虛誘集匪徒分擾諸縣當陽保康來鳳竹山相繼失陷 詔諸大帥分路攻剿而公與將軍舒公攻當陽卽選驍勇扼山隘殲其外援三千人賊悉力死守公親督將士以火箭火彈射入城中燒其礮臺及蓄聚七月克東門賊退守西北復擊殺殲二千餘人擒其僞帥縣境悉平事聞 賜賚

優渥賞輕車都尉世職復馳至襄陽督同鎮道邀擊賊於青河口破之時征苗大學士貝子福公總督和公相繼徂謝公密奏乾州已復首逆就擒惟石柳鄧未獲而以十萬之衆駐守蠻瘴苗人見有重兵生計無資石逆轉得從中煽誘不若因其窮困許以自新酌節裁撤苗寨官兵而於四面設兵防守其有出外滋事及同類讐殺者用以苗攻苗之法可不再煩兵力 詔下其章於軍中議之未幾大兵破平隴斬石柳鄧等遂 詔公馳往湖南籌議善後及撤兵事二年春抵乾州周歷三廳撫諭苗寒清釐民苗地畝給還耕種咸伏地感泣各歸

生業各省兵亦次第撤回公遵 旨留駐辰州與巡撫  
姜公提督鄂公會奏請移提督駐辰州而以辰州協駐  
乾州洞庭協駐常德又於花園汛添設一鎮以永綏協  
保靖管隸之它要隘之處撥兵屯守聯絡控制其苗寨  
酌設土弁以資約束又估修城堡營房賑撫難民卹贈  
殉難官弁及紳士婦女皆得 旨勅部議行而公以炎  
瘴致疾食少事煩未極大年此海內識與不識靡不驚  
怛墮淚者也公識量闊遠喜愠不形於色遇僚屬以禮  
議事不執已見人人皆得盡其言若大疑難事衆莫識  
所措者公沈機立斷雖萬口不能奪久莅方面職事修

舉不以察察爲明亦不以煦煦要譽所薦拔多至大僚  
或在同列亦未嘗引爲己功公天性純孝旣貴自傷祿  
不逮養賴母氏教誨成立迎養官齋修潔白之膳及張  
太夫人棄世遇諱日哀慕出涕嘗陳情 上前 御賜  
經訓克家四大字隨於靈巖南麓築樓以奉 御書旁  
建張太夫人祠堂俾子孫毋忘所自與竹癡梅泉兩弟  
友愛無間視諸姪如己子兩妹早寡爲置產贍其孤甥  
俾克有成生平薦於故舊尤好汲引後進一時名儒才  
士多招致幕府公務之暇詩酒唱酬登其門者以爲榮  
性好著書雖官至極品鉛槧未嘗去手謂經義當宗漢

儒故有傳經表之作謂文字當宗許氏故有經典文字  
辨正書及音同義異辨之作謂編年之史莫善於涑水  
續之者有薛王徐三家徐雖優於薛王而所見書籍猶  
未備且不無詳南畧北之病乃博稽羣書攷證正史手  
自裁定始宋訖元為續資治通鑑二百二十卷別為攷  
異附於本條之下凡四易稿而成謂史學當究流別故  
有史籍攷之作謂史學必通地理故於山海經晉書地  
理志皆有校注又有關中勝蹟圖記西安府志之作謂  
金石可證經史宦跡所至搜羅尤博有關中中州山左  
金石記詩文下筆立成不拘一格要自運性靈不違大


雅之旨有靈巖山人詩集四十卷文集八卷公生於雍  
正八年八月十八日春秋六十有八汪夫人淑慎有壺  
德候補知府□□女先公三十年卒子三人念曾候補  
員外郎早沒次嵩珠一品廕生候補員外郎次鄂珠候  
選員外郎女四人長適陳暉次許字秦□□次許字孔  
慶鎔次未許字孫二人蘭慶承襲二等輕車都尉芝祥  
候選員外郎曾孫二人銘曰


咨牧命虞分陝翼周十連有帥統小諸侯魏晉暨唐職  
均名別都督總管節度觀察峴首羊杜秦塞范韓先後  
禦侮為國屏垣猗與畢公懋德之裔文章潤身温飽非

志南宮首選 北闕臚傳風度凝重儼若神仙智方行  
圓明體達用三館楷模中朝梁棟

帝曰汝諧試之監司盤根錯節利器無虧乃撫三秦冰  
澄月朗籌邊餉軍萬里指掌乃撫汴洛載修河渠荒政  
具舉黔首以蘇乃撫齊魯正躬率下廣宣 皇仁民抃  
而舞江漢之許控扼蠻荆公督餽餉士飽馬騰潢池偶  
警親提桴鼓胷有甲兵人百其武負隅猶鬪一鼓而殲  
露布星馳 錫命用占苗逆已擒苗民來格公承 廟  
謨爲永久策出入叢菁涉歷瘴雲遮道羅拜共戴 尊  
親迺撤貔貅迺設屯戍漢燧罔驚藩籬孔固大星忽隕

梁木其傾 楓宸悼惜崇班晉膺公之 恩榮勲名終  
始 頒祭尚方澤及孫子硯山之陽水木明瑟某水某  
邱舊游髣髴井椁是卜公其樂茲我文紀實或無媿詞





潛研堂文集卷四十三

嘉定錢大昕

墓志銘二

江西道監察御史王先生墓誌銘

先生姓王氏諱峻字次山號良齋蘇州常熟縣人大父  
應祥父志學俱以先生貴贈文林郎翰林院編脩先生  
少敏慧讀書數行俱下年十八補博士弟子才名籍甚  
同里宋君玉才與先生最相善並受業於陳見復先生  
一時稱為王宋既而入都以國學生應京兆試中雍正  
元年 恩科舉人明年試授內閣中書尋登進士第改

翰林院庶吉士充一統志纂修官五年散館授編修七年典浙江鄉試十年典貴州鄉試乾隆元年典雲南鄉試先後甄拔號稱得人明年

詔開言路遴朝官有清望者俾居臺諫之職而先生以名史官改授江西道監察御史拜命三日卽抗章劾臺長官素行不叶人望罷之當是時先生直聲震都下先生感

上知遇能用言方具疏艸累數千言未及上而太夫人之訃至遂戴星而歸杜門養病者十餘年學益富品益高弟子著錄者日益衆當事爭延先生爲士子師於揚

主安定書院於徐主雲龍書院而於蘇之紫陽書院尤久以古學提唱後進所賞識後多知名性剛褊視時俗依阿齷齪畏蒞者流不欲姑與爲伍而人有一事一節之長則稱賞不置有三代直道之遺焉尤精地理之學談九州山川形勢曲折向背雖足跡所未到咸瞭如指掌嘗謂水經正文與注混淆欲一一釐正之而唐以後水道之變遷地名之同異鄭注所未及者則撫正史及傳記小說近代志乘以補之名曰水經廣注手自屬藁未暇成也詩古文直抒性靈不加雕琢書法初宗北海後師東坡晚年自謂窺古人用筆之意所書碑碣盛行



吳下片楮隻字人知珍之先生壯年崇尚氣節慨然欲有爲于世旣以病廢不欲出山則思見之著述而天不假年未竟其業旣沒之後有與先生善者刻其所著良齋詩文集若干卷行于世雖未足以盡先生亦略見先生之概已先生久登清要不名一錢歸田後猶以教授自給清風特操當於古人中求之春秋五十有八乾隆十六年二月十七日終於里第家貧子弱久未克葬頃歲季子淮安府桃源河務同知本智乞歸養母乃卜辛亥歲臘月十四日葬先生於某鄉之原距先考塋若干步遵遺命也配馮宜人教子有法今壽躋百齡康強逢

吉大吏入告行有旌門之榮子二人禮縣學生先卒本智由盱眙知縣遷今官女一人壻朱聲孫□人□某官大昕少而鈍拙無鄉曲譽先生聞其可與道古也薦之使學於紫陽書院先生於諸生中最賞者厘三數人願獨稱大昕不去口先生歿垂四十年而大昕來主紫陽遵守先生教規罔敢有懈先生之葬與執紼焉東漢墓銘多由門生刊述俛仰今昔音容如存而衰老無成孤負知已援筆泫然情見乎詞銘曰

尚湖之水清且直兮誰其似之夫子之德兮少可于俗多師于古有所不爲合乎狷者孔翠以文鷹隼以威位

潘氏堂文集卷四十三  
三  
未酬德沒而名垂退之諛墓古人所譏先生之銘斯無  
媿詞

翰林院侍讀邵先生墓誌銘

歲丙戌之秋翰林院侍讀太倉邵先生請告歸將出都  
門諸與先生善者咸至其邸敘別先生素清羸善病年  
未及耆輒有懸車之思嘗屬工畫者畫已小像取陰鏗  
鈞晚欲收綸之句題曰收綸圖乞一時名流賦詩其高  
致如此乃歸未及一載嬰疾遂不起嗚呼世方競于功  
名而獨尚恬退其所取者廉矣宜不爲造物者之所忌  
而亦靳之不得如志此又理之不可知者也先生諱嗣

宗字鴻歲別號蔚田先世居休寧號東門邵氏祖光龍  
始遷於太倉以潛德篤行稱考學詩本生考學易並以  
先生貴 誥贈奉直大夫翰林院編修加三級先生幼  
穎異在傅不勤年十八補博士弟子歲科兩試輒屈其  
儕輩時同里毛先生宣夔亦以文名州人稱能文者必  
首毛邵歲辛酉以選拔貢生舉本省鄉試壬申

聖母皇太后萬壽

特詔開科以秋八月會試主司海寧陳文勤公於闈中  
得先生卷大賞異之手定第一及程墨出淳厚典重海  
內翕然奉爲圭臬吾州自建治以來試禮部第一者明

代則陸太常欽王相國錫爵吳祭酒偉業 本朝百餘  
年間惟先生而已 廷試 賜進士出身改庶吉士散  
館授翰林院編修充 咸安宮官學總裁以病乞假假  
滿補原官擢右春坊右中允轉左春坊左中允進翰林  
院侍讀先生在詞垣十有餘年朝章典故咸所諳習分  
修續文獻通考用力尤勤及

詔修宗室王公勲績表大學士劉公統勲委先生專司  
其事舉凡起例較若列眉書成進 御深蒙 嘉獎僉  
謂先生不去駸駸乎向用而先生以積勞致疾賦遂初  
矣性耿介傲居宣武門外公退却掃終日門無雜賓分

校鄉會試各一分教庶吉士者三獎成後學循循不勸  
自為諸生常授徒自給既貴門弟子著錄益眾大都皆  
東修自好之士或藉以標榜干進者則拒勿通也其教  
子弟則曰君子持身無過廉儉二字不儉則不廉不廉  
則無恥聞者以為篤論所著詩曰一枝菴吟稟養餘齋  
吟稟皆藏于家先生生於康熙四十九年八月二十六  
日卒於乾隆三十二年閏月三日春秋五十有八配趙  
宜人先卒子二人士潔士洙皆太學生女一人適乙酉  
科副榜貢生王琯孫三人先生既沒之明年八月孤士  
潔等奉匱葬於新塘之原以趙宜人祔禮也大昕以同

淳石室文集 卷四十三 五  
郡後進與先生同在書局有年知先生之生平爲詳乃  
敘而銘之曰  
行修而文腴志芳而貌臞清而不絕乎俗貴而不易其  
初知止知足亦元亦儒貞石可泐嘉名弗渝

虛亭先生墓誌銘

外舅虛亭先生之葬以乾隆四十四年十一月二十一  
日先期西莊鶴溪使來告曰先文毅公墓志其女夫周  
益公實爲之女今先君子井椁旣卜援吾家故事屬銘  
於子大昕曰以益公之文猶不自名而託張真甫名況  
庸下如大昕者夫何敢頓首固辭不獲已乃泫然出涕

敘之曰先生諱爾達字通侯號虛亭姓王氏先世與宋  
太尉魏國文正公旦同出文正從子元始居崑山縣之  
新漕里數傳至左朝請大夫崇政殿說書葆卽文毅公  
文毅九傳至明監察御史遜遜子復亦官監察御史小  
御史之曾孫國子監司業同祖司業生處士逢年竝知  
名前代先生曾祖在畿縣學生是惟處士之孫祖鎮圭  
皇贈修職郎考焜康熙丙子舉人丹徒縣儒學教諭  
贈通議大夫通議始卜居嘉定而先生猶以新陽籍  
應試新陽本崑山析置示不忘本也先生同產四人齒  
最居少事通議孝謹無違通議官丹徒獨攜先生自隨

依倚如左右手伯兄蚤歿與邱姣同居終身無閒言叔  
兄素失愛於通議銜憾數加陵侮先生受之無忤色鄉  
黨稱道焉性疎直易怒亦易解嘗面斥人過頰項皆赤  
少選復與响响好語忘其人之蓄怨也平生不善治產  
往往益無斗儲然吟詠未嘗輟遇極作惡事姑置之或  
隱几坐須臾熟寐醒後復不復記矣讀書好瀏覽不爲  
章句學弱冠後補博士員試輒冠其等食廩餼爲諸生  
祭酒屢試行省不見讎中歲以後乃專意於教子以爲  
文章者不朽之盛事科舉之學非可以傳後也故導之  
以詩古文又以爲詞章之學可以潤身未可以言道故

進之以經學近三十年來東南士大夫言古學多推嘉  
定而嘉定之好古學自王氏始西莊旣貴先生優游林  
園日手一編不置或招朋舊爲真率會斗酒脫粟無異  
老儒好作詩以放翁後山爲師寓意目前多自得之趣  
書法險勁不冝作圓輒態春秋七十有六以乾隆三十  
三年五月二十八日捐館 誥封通議大夫光祿寺卿  
加一級夫人朱氏江寧府儒學訓導金銓之女 誥封  
淑人先五年卒事尊章甚孝處約而好施先生之家事  
治緊淑人是賴先生有賢子二人長鳴盛甲戌進士第  
二人及第官至內閣學士兼禮部侍郎左遷光祿寺卿

潛石堂文集卷四十三  
學者稱西莊先生次鳴韶新陽縣學生號鶴溪子女子  
二人長適縣學生顧我澍季卽大昕妻孫男女若干人  
大昕年十五應童子試先生亟賞其文西莊亦謂子可  
與共學因許以愛女招爲館甥嘗言李彥平范致能周  
子充皆吾先世門婿所以期許甚厚先生好譽兒又兼  
譽子人或笑之則曰久當信我言今在苒四十年文稍  
有名而德不加修九原可作媿其曷勝銘曰

學不必用蘊而益純古訓是式以遺後人豈惟後人邑  
中之彥聞其風者古學大闡夏駕之西車塘之原宰木  
鬱狀四尺新阡太邱壇耶老翁泉耶君子之澤終勿謾

耶

中書舍人吳君墓誌銘

乾隆十有六年春

車駕巡幸江浙觀民設教典禮畢舉士大夫作爲歌頌  
獻之 行在

天子命江浙學政選其優者召試而親甲乙之於浙江  
得士三人曰嘉善謝墉崑城錢塘陳鴻寶位人秀水王  
又曾穀原於江南得士六人曰懷寧蔣雍植秦樹全椒  
吳煊荀叔長洲褚寅亮摺升休寧吳志鴻沁可常熟孫  
夢達中伯而予以謏劣亦與數中有

詔之九人者皆授以內閣中書舍人之職中書故稱清望官亞於詞林非由科甲出身者不得與九人之中惟中伯已登進士其八人皆諸生也

特賜之舉人俾得應禮部試天下莫不榮此九人者謂制科以來未有此曠典也諸人既受命以是歲先後入京倬直內閣獨予與摺升沁可以明歲始至而沁可之至又在後與之言端重而愿慤介然有所守君子人也其六月置酒於崑城寓邸九人者皆至痛飲甚樂嗣後或一月或半月輒小集中書舍人例閒三日一入直閱十日則持被宿于直廬它日無事則相從談詩文雜以

詼嘲泥酒取飲蓋無日無之也既而崑城以進士入翰林中伯遷宗人府主事兩人蹤跡少疎又二年予與穀原同登進士予承乏詞館穀原改官禮部未幾乞假去而荀叔亦移疾去偶以公暇過諸君談諧泥飲如平時然較之往日差希矣又三年沁可歿于京邸予入哭盡哀九人之中遽摧其一痛逝者之不可作蓋慨然有聚散之感也又五年穀原訃至遙設位哭之又一年復哭中伯于京邸同時來唁者惟崑城秦樹及子三人而已嗟呼彈指十餘年間聚首歡宴歷歷如昨日而死者三之一其他或聚或散如風中萍來去靡定欲求曩者高

會之盛邈如隔世悲夫沁可休寧人僑居蕪湖生於康熙五十七年某月日歿於乾隆二十二年某月日春秋四十配某氏沁可未歿之前十日子過其寓齋沁可課幼女讀唐人絕句詩略能上口令拜予作男子揖世俗言以此厭無子也沁可長于小篆工刻私印好作詩嘗與予在 圓明園直廬聯句賦冰茶數十韻頗爲好事者所傳云銘曰  
古今才人患不達一經皓首困帖括  
省方召試求真才親收九人君其一文苑傳選舉志君之名垂奕世

翰林院檢討毛君墓誌銘

君諱式玉字伊人乾隆六年以諸生舉于鄉又十一年試禮部中式又二年 廷試 賜同進士出身改庶吉士又三年授翰林院檢討又一年 御試詞臣君名入三等以本官致仕又三年

天子幸五臺山君獻詩 行在稱

旨仍以本官召是歲某月某日卒於官年口十有口惟毛氏世占籍萊州府之掖縣自明以來世爲簪纓甲族父貢官潁州知州祖霽曾祖偉皆以潁州貴贈如其官階奉直大夫妻李孺人繼妻單孺人子某君貌皙而羸



望之如不勝衣叩其學淵然不竭家無甌石儲而聚書多善本好為古文嗜金石刻以翰林歸田日嘗騎驢裹糧入天柱山徧拓元魏高齊碑道旁觀者不知其為貴人也初入詞垣讀國書不數月悉究其旨強記絕人同輩就君質所疑各如其意以去少詹事德爾泰公分敎國書歎曰今之巴克什也居京師不與要人往來閉門却掃人莫窺其際葬以某年月日同年生嘉定錢大昕為之銘銘曰

稷下談士急功喜夸君獨恂恂與古為徒再入承明不為數奇文而不年天乎何尤

封榮祿大夫內閣學士兼禮部侍郎加二級前翰林院庶吉士內閣典籍尹公墓誌銘

乾隆五十年正月

天子詔舉

聖祖皇帝宴千叟故事集王大臣官員士民年六十以上者 錫宴 乾清宮於時 誥封榮祿大夫前內閣典籍蒙自尹公以就養京邸

特准入宴與一品大臣列坐丹墀東

天顏咫尺仰瞻 溫霽禮畢捧所賜杯盤以出復

賜靈壽杖如意數珠貂皮文綺諸物異數優渥朝野歎

羨公籍隸滇南距京師萬里又久辭朝簿得預嘉會洵  
千載一時也越二年九月乙丑朔終於京邸春秋七十  
有三長子內閣學士壯圖扶櫬南歸縵絰踵門述公遺  
言屬于文其誌石嗚呼公子同年友也俯仰三十餘年  
升沈零落觸緒增感公與子皆寡交而獨以行誼相取  
子歸田十載朋舊多不通尺牘惟公與曹宗丞慕堂緘  
問不絕自公云亡慕堂繼逝而子益無賴矣梨德之詞  
其何敢辭公諱均字佐平先世河南懷慶人明兵科給  
事中革以言事謫雲南太和縣丞因占籍蒙自曾大父  
若時明季諸生大父文熾康熙丁卯舉人兵部主事父

宗梁康熙丁酉舉人廣西桂林府同知兩世皆 誥贈  
榮祿大夫妣皆一品夫人公幼入小學卽不逐童兒嬉  
戲每家慶徵歌演劇常挾冊獨坐一室中年十九補縣  
學生歲科試輒冠其偶癸酉秋鄉試主司於遺卷中得  
公卷大奇之遂與鄉薦明年成進士選翰林院庶吉士  
又三年散館仍歸進士班乃授河工例改選內閣中書  
未及補而丁內艱服闋入都又久之始得缺在職九載  
執事勤恪以俸次轉典籍記名以主事用丁酉歲京察  
以年老去職時閣學已官御史就養子舍灑然自得初  
封朝議大夫江南道御史加二級再封通議大夫太僕

寺少卿加二級三封榮祿大夫內閣學士加二級公之初登第也向例釋褐進士先由王大臣揀選以備館職是科雲南入選僅建水倪君高甲一人及引見上顧閣臣曰尹某勝於倪多矣何以不在選中遂得預館選既而倪君由吏部擢監司公尚踴躍仕路人咸以爲數奇及晚年階封一品康強逢吉乃信

聖天子鑒賞自有真也公事親孝父殯松皋去城六七里公結廬殯側三載晝歸侍太夫人暮則返倚廬雖寒暑雨雪無間因自號松皋居士及奉太夫人合葬適大雷雨匠役皆走避公撫棺危立不迨寸步羣從子弟亦

罔敢離次踰時雨止遂克成禮昆弟五人門無異財視昆弟之子如己出節縮俸入以葺宗祠經畫井井可垂永久生平最惜物力自奉極淡泊而篤於故舊慷慨無少吝爲諸生時應秋試中途遇故人物故卽解囊爲治殯斂留一日乃行官京師日鄉前輩通政楊公如松病革適其子以事被逮其子婦扣門告以急難公亟偕醫往楊已不起卽爲理喪具并轉屬刑部保釋其子俾就苦次楚雄王貢生鎬臥病逆旅已劇公往視之泣以後事相託公令迨至已寓延醫治之數月而痊鎬感泣請受業爲弟子鄉人落魄無所依及旅櫬未返者輒爲匿

畫得生還歸葬者甚多好飲豆湯每月必命數設呼子  
若孫共啖曰此吾鄉味若曹卽富貴慎勿忘也公與閣  
學同官京師父子入直常共載一車諸城劉文正公聞  
而歎曰尹舍人可謂以清白遺子孫矣夫人伍氏戶部  
員外郎士祺之孫女貢生正期之女淑慎明達白首相  
敬累封一品夫人子五人壯圖乾隆丙戌進士今爲內  
閣學士兼禮部侍郎會圖增廣生全圖廩貢生慶圖健  
圖皆國學生女二人壻曰楊雲官曰伍東垣孫男十四  
人孫女九人銘曰

易稱積善家慶有餘黃金盈籬不如詩書於維榮祿如  
漢萬石不言躬行德隅抑抑文章派別一家所師科第  
拾芥爲國羽儀清華之選世重館閣公皆履之依然瓠  
落南山有橋本固枝籓過庭貽訓爰大其門承歡甘載  
就養左右熙熙怡怡齊眉皓首紫泥申錫一品班崇考  
甫是則三命滋恭

帝有恩言錫宴于叟公預其閒稽首拜手手捧上尊徐  
步天衢又何錫之鳩杖數珠矍鑠斯翁觀者屬目何  
以致之義方之勛人生三寶曰儉與慈不爲物先公實  
兼持易簧之辰神明未昧屈指舊游尚及吾輩素車萬  
里歸于松楸諸孤攀號泣血紛流溪谷有遷合閭難沫

同心之言俾勒幽室

日講起居注官翰林院侍講學士曹君墓誌銘  
翰林院侍講學士曹君習菴子同里總角交也君之高  
祖母子曾祖姑而子曾祖母則君高祖姑君之尊人檀  
湑公爲先大父入室弟子子又受業於檀湑公君少於  
子三歲相視若昆弟然已而同客吳門先後以

召試通籍又同在詞館應 制詩文互相商榷游覽宴  
集出入必偕者蓋四十年予視學東粵僅半載奉諱歸  
里遂不復出又十餘年習菴亦視學於粵臨行貽書告  
予謂任滿日當乞養南歸相從尋山水之盟乃到任僅

半載奉太夫人之諱馴至不起嗚呼當代失一大手筆  
間者無不盡傷況交親至厚如予者乎孤子臣屣以誌  
銘見屬誼不可辭君諱仁虎字來應別號習菴本姓杭  
氏世居嘉定之周公邨十世祖維德功孤依母氏居外  
家子孫因以曹爲氏五世祖元嘏移居城西之外岡高  
祖國正贈武德將軍曾祖錫命康熙壬戌武進士湖廣  
撫標中營游擊祖源歲貢生以君貴累贈中憲大夫始  
移居縣城父檀湑公文行爲士林推重弟子著錄最盛  
歲貢生候選訓導以君貴 詔封奉直大夫 晉贈中  
憲大夫母程氏累封太恭人君少而好學沈靜不妄出

一語而於所讀書悉能貫串同邑王君鳴盛少負才俯視儕輩獨偁君與子爲二友年十六補博士弟子學使蒲州崔公紀有奇才之目中丞覺羅雅公樛亭選高才入紫陽書院肄業州縣以君名應時青浦王君昶與子亦同入院三人者食則同爨夜則聯牀而長洲吳君泰來上海趙君文哲及王君鳴盛數過從相與鏃厲爲古學君在院尤久院長沈文愨公數稱其詩學使寧化雷公鉉舉君優行乾隆二十二年

聖駕南巡君獻賦 行在

召試列一等

特賜舉人授內閣中書倬直之暇刻意吟咏未嘗造請貴游二十六年成進士改翰林院庶吉士散館授編修君詞賦久爲海內傳誦及在禁林每遇大禮高文典冊多出其手館閣代言之文院長輒委屬艸皆典重清切宜古宜今擢右春坊右中允充 日講起居注官扈蹕盤山有奉

敕廣和諸作遷翰林院侍講轉侍讀進右春坊右庶子擢侍講學士五十一年奉

命視學廣東與平少詹恕交代少詹爲諸生時嘗受業於君粵人傳爲美談明年程太恭人終於官署君方按

濟研室文集 卷四十三  
試連州不及視舍殮聞訃晝夜號泣甫而月竟以毀卒  
時乾隆五十二年八月八日距生於雍正九年五月五  
日春秋五十有七娶陸氏繼娶申氏董氏皆前卒子臣  
晟女二人君起家儒素以文字受

主知久列承明著作之廷京察常居一等兩遇

大考皆列二等教習庶吉士凡七科前後典鄉試者二  
分校順天鄉試者一分校會試者三總裁武會試者一  
後進得其品題便成佳士舟車所至乞詩文者屢滿戶  
外博極羣書精於證據詩宗三唐而神明變化一洗粗  
率佻巧之陋格律醇雅醞釀深厚卓然爲一時宗少時

與王吳趙諸君唱酬彙刻其詩流傳海舶日本國相以  
餅金購之在京華與館閣諸同好及同年友爲詩社率  
旬日一集或分題或聯句或分體每一篇出傳誦日下  
今所傳刻燭炙視二集是也其事二親孝所得俸錢分  
寄諸弟無私藏焉所著詩有宛委山房春槃瑤華倡和  
秦中雜稿轅韶鳴春諸集又有蓉鏡堂文稿二十四氣  
七十二候攷轉注古音攷學士在唐宋時預聞機密今  
則專以文字爲職然亦惟鴻筆麗藻斯與職稱學優如  
君其不謂之眞學士也夫銘曰

威鳳五采鳴于朝陽詞臣報國厥惟文章漢廷枚馬鄴

下陳王詩歌元白制誥常楊慶歷歐梅元祐蘇黃虞楊  
范揭高楊徐張淵哉若人文苑之英名位未極令聞不  
忘誰其銘之疇昔鷹行竹林路杳懸河淚滂

李南澗墓誌銘

己卯之秋予奉

命主山東鄉試得益都李子南澗天下才也填榜日按  
察沈公廷芳在座起揖賀予得人越三日南澗投刺請  
見與語竟日所見益奇於所聞南澗與人交有終始雖  
交滿天下獨喜就予在京都日相過從其歸里也每越  
月逾時手書必至得古書碑刻或訪一奇士必以告及

出宰劇縣在七千里之外奔走瘴癘簿書填委而書問  
未嘗輟覩縷千百言從不假手幕客予嘗夢遊南澗官  
齋覺而書至意甚異之殆所謂同氣相求者去歲南澗  
自粵西貽予書言生癰於尻甚劇自後久不得音問又  
數感惡夢今冬其弟文濤使來告曰吾兄以去年八月  
四日病癰終於官舍遺命不作行狀以自編年譜乞先  
生銘其墓嗚呼南澗果死矣世豈復有此才哉南澗諱  
文藻字素伯一字茵晚晚又號南澗先世自棗強遷益  
都之春牛街祖元盛父遠皆以南澗貴贈如其官南澗  
天姿俊朗年十三從父遊曹家亭子作一記傍赤壁賦



已有思致十五學為詩二十一補縣學生好博覽今古  
不為世俗之學所至必交其賢豪長者既以第二人舉  
鄉薦明年會試中式又明年成進士 廷對策博瞻為  
進士最以補試例不與進呈之列然讀卷官交口歎賞  
無異詞久之謁選得廣東恩平縣知縣到任後奉檄署  
新安縣又奏調潮陽縣知縣以海疆三年俸滿保薦擢  
廣西桂林府同知未及一年而沒其居官以清白強幹  
稱嶺南俗多竊牛牛皮色相似雖獲盜多不承有司無  
如之何南澗始至令有牛之家各於牛角印烙私記凡  
赴墟賣牛者牙儉以印烙登簿以印付買主如告失牛

先以印呈官官遣役持印驗墟簿無得隱者大府善其  
法下所部行之陽江民劉維邦以母病延道士作法借  
鄰人刀十柄縛梯上以驅祟吏索錢不遂取刀送縣証  
以不軌南澗奉檄往勘廉得其實白於上官釋之未幾  
陽江合以它事被劾銜南澗甚遣親信僕潛至恩平欲  
探陰事中傷之居兩月無所得乃已潮陽民好械鬪往  
往殺傷多人南澗至則懸鉦於堂上有將鬪者令地保  
馳入城擊鉦以告立往拘治眾則散矣自是械鬪稍息  
縣故有東山書院延進士鄭安道為師購經史子集數  
十種以教學者潮陽與海陽揭陽俗稱三陽仕其地者

多致富南澗去官之日囊橐蕭然還至番禺命工摹光  
孝寺貫休畫羅漢四軸以歸曰此吾廣南宦橐也性好  
聚書每入肆見異書輒典衣取債致之又從友朋借鈔  
藏弄數萬卷皆手自讐校無輒近俚俗之本於金石刻  
搜羅尤富所過學宮寺觀巖洞崖壁必停驂周覽有僕  
劉福者善椎拓攜紙墨以從有所得則盡搨之嘗乘舟  
出迎總督小憩南海廟命僕拓碑秉燭竟夜比曉問總  
督舟已過矣其詩古文皆自摭所見不傍人門戶視近  
代模擬膚淺以爲大家蔑如也然口不道前輩之短以  
爲非盛德事過嶺後治公事日不暇給而詩益工郵亭

僧院信筆留題雖與隸皆知爲才子也生平樂道人之  
善鄉先正詩文可傳者必撰次表章之元和惠定字發  
源江慎修皆素未相識訪其遺書刊行之德州梁鴻翥  
窮老而篤學月必誦九經一過鄉里咸目爲癡南澗一  
見奇之爲之延譽遂知名於世其在嶺表士子以文就  
質無虛日獨稱欽州馮敏昌順德胡亦常張錦芳作嶺  
南三子歌其獎借後進誠有味乎言之也子嘗戲論南  
澗有三反長身多髯赳赳如千夫長而胸有萬卷書一  
也生長於北海官於南海二也湛思著書欲以文學顯  
而世稱其政事三也嗟乎以南澗居家之孝友當官之

廉幹與友之誠信固已加人一等乃其所篤嗜者文章也文人之病恒在驕與吝而南澗獨否使其得志必能使古之文士有以永其傳今之文士不致失其所而竟不遂此吾所以爲斯世惜也悲夫悲夫南澗娶邢氏先卒繼室周氏生子三人章郵章棉章姚俱幼女子三人

銘曰

偉哉李生文中之雄兮四部七略羅心胸兮名登甲科官至五品不爲不庸兮胡爲不與石渠蘭臺之選以昌其文乃以能吏終兮昔裴幾原自占死期不過戊戌歲任彥升常恐不過五十果四十九而云逝嗟哉李生年

壽適與同兮恒幹不可留修名永無窮兮廣固之里宰木翳如千秋萬歲過者下馬曰才子之幽宮兮

日講起居注官翰林院侍講學士邵君墓誌銘

嘉慶紀元之春餘姚邵君二雲自左庶子擢翰林院侍講學士兼文淵閣直閣事君以懿文碩學知名海內及被召入四庫館總裁倚爲左右手朝廷大著作咸預討論每經進書籍九重未嘗不稱善迴翔清署

二十有餘年至是始轉四品乃以編書積勞成疾疾且愈矣醫者誤投藥遂不起實六月十五日春秋五十有四訃至吳下予爲位哭之慟因憶乙酉秋予奉

命典試浙右靳取奇士不爲俗學者君名在第四五策  
博洽冠場僉謂非老宿不辦及來謁纔逾弱冠叩其學  
淵乎不竭予拊掌曰不負此行矣越六年禮部會試第  
一 賜進士出身乾隆三十八年有

詔編次四庫書思得如劉向揚雄者用之宰相首以君  
名入告 召赴 闕除翰林院庶吉士充纂修官逾年  
授編修久之

御試翰詹諸臣君名列二等遷右中允四轉而至今職  
嘗預修 國史

萬壽盛典八旗通志校勘石經春秋三傳由 文淵閣

校理進直閣事充 日講起居注官總裁 咸安宮官  
學提調 國史典鄉試者一教習庶吉士者再階由儒  
林郎至中議大夫君少多病左目微眚清羸如不勝衣  
而獨善讀書數行俱下寒暑舟車未嘗頃刻輟業於四  
部七錄無不研究而非法之書弗陳于側嘗謂爾雅者  
六藝之津梁而邢叔明疏淺陋不稱乃別爲正義以郭  
景純爲宗而兼采舍人樊劉李孫諸家郭有未詳者摭  
它書補之凡三四易稿而始定今承學之士多舍邢而  
從邵矣自歐陽公五代史出而薛氏舊史廢獨永樂大  
典采此書君在館會粹編次其闕者采冊府元龜諸書

補之由是薛史復傳人間予嘗論宋史紀傳南渡不如東都之有法寧宗以後又不如前三朝之粗備微特事迹不完卽褒貶亦失實君聞而善之乃撰南都事略以續王偁之書詞簡事增過正史遠甚畢尚書沅續宋元通鑑常就君商榷輒歎曰今之道原貢甫也君生長浙東習聞戢山南雷諸先生緒論於明季朋黨奄寺亂政及唐魯二王起兵本末口講手畫往往出于正史之外自君謝世而南江文獻無可徵矣君所著又有孟子述義穀梁正義韓詩內傳攷皇朝大臣謚述錄輶軒日記皆實事求是有益于學者君至性過人事親喪葬盡

禮篤于故舊久要不忘性狷介不踏權要之門以教授生徒自給退食之暇執經者環侍左右君隨問曲諭人皆得其意君亦以師道自任莫敢以非義干者詩文操筆立就淵博奧衍自成門戶有南江詩文稿君諱晉涵字與桐二雲其號大父向榮康熙壬辰進士父佳銳增廣生皆以君貴贈中憲大夫元配□恭人子秉恒秉華卜葬君于某鄉某原先期來請銘於戲自四庫館開而士大夫始重經史之學言經學則推戴吉士震言史學則推君君於國史當在儒林文苑之列朝野無間言而知之最先者予也予比歲衰病嘗預戒兒輩必求

潛研堂文集卷四十三  
二雲銘我孰意天寔祝子轉以才盡之筆納君穿中也此所以泣然而失聲也銘曰

浩浩南江導源岷山厥生名儒特立絕羣陽明以功黎洲以文誰與參之其在二雲名冠南宮書校東觀爲真學士爲良史官槐鼎何慕竹帛常尊著書滿家自信千年古三不朽言其一焉溝滄易涸視此原泉

潛研堂文集卷四十三

門人袁廷檣校字

潛研堂文集卷四十四

嘉定錢大昕

墓志銘三

山東曹州府桃源同知彭君墓志銘

致政兵部尚書長洲彭公之家嗣山東曹州府桃源同知諱紹謙乾隆三十六年請假省覲以公年高假滿遂不出越四年以疾終於葑門里第尚書公諸子皆賢而文而桃源於家爲令子於官爲循吏德優而未盡施其歿也公哭之慟而親故僚友靡不盡傷越丁酉歲十一月丁丑卜葬於吳縣十二都下六畝雅宜山下卽元配

穆宜人之塋而合祔焉先期嗣子希韓述事狀乞大昕  
爲之銘曰

彭氏之先實始江西明初徙吳科第蟬聯維高大父

皇朝進士作宰長寧文與行脩生子修撰首舉南宮廷  
對第一以侍講終侍講之子鄉飲大賓光祿大夫

錫封 紫宸實生尙書會狀兩元踵乃祖躅近古罕倫

官躋一品未耄歸田

詔列九老

賜遊香山五

丈夫子君爲長兄厥諱紹謙字之濟光幼順乎親左右  
就養讀書萬卷瞭若指掌丁卯鄉舉仲弟同登再黜禮  
部乃就銓衡 詔往試哉作令於東初攝陽穀秋漲

暴衝親往督振以蘇乏窮里正地方按戶籍充吏不假  
手民以爲公後失其法乃至訟凶假牧平度移攝在平  
奄邁內憂犇號戴星中月禫除起知新城湖壩窪下地  
棄不畊假民子種秬稻是執計頃百餘灌漑用利青沙  
之泊設隄爲防曰彭公堤民永不忘在官三載改治汶  
上 鑿輅時巡供頓無曠南旺之西有宋家窪水潦  
所瀦廢爲汙萊久議宣洩恐妨下游羣口附和築舍道  
謀君規隄南故河可疏折而南出微山諸湖以鋪水法  
廣深積筭下游所受長不盈寸繪圖上府大吏允諧六  
旬畢工厥利溥哉成賦之地三千頃餘昔委巨浸今稱

上腴丙戌秋霖水溢禾稼申請振卹民無饑者大府考績以卓異舉保甲令行姦無容所他盜入境詰而擒之詔特引

見擢遷同知曹州桃源毗連宋魯以君分

治爲劇郡輔姻親引嫌循例改補乞假覲省一堂春煦晨昏子舍養日方長五十而慕樂未渠央五十有一百歲甫半孟冬下旬邁疾捐館伯子希韓次日希曾希彥希仲叔季相承伯也舉鄉校書武英女子子六咸締簪纓夫人繆氏庶常之子洗馬之孫相敬以禮善事君姑宜於築里螽斯繩繩咸鄙稱美先歿八載卜葬斯阡今開厥兆合祔宜焉疆閭作謠歲十一月丁丑旣望筮

云其吉惟君孝友施於有政敦族全交言必顧行閑家一編以代庭誥非苟知之亦已允蹈

帝眷吏治謂宜顯揚才而不年未旣所藏羸博之葬誰能忘情述銘慰公百世有徵

湖北荆宜施道前翰林院修撰陳公墓志銘

乾隆五十有二年六月二十七日湖北荆宜施道前翰林院修撰陳公永齋卒於里第春秋五十有一越三年將卜葬於吳縣某鄉九世祖僖敏公賜塋之窆先期公之仲弟中書舍人希哲屬子志其墓石蔣上舍業咸亦爲之請乃按故兵部侍郎蔣公元益所述家傳敘次之



公諱初哲字在初別號永齋世居蘇州之吳縣自僖敏公以文學經濟歷官都察院左都御史爲明正統中名臣厥後代有文學隱而未曜曾太父元揚好善能教其子大父震品學醇厚從故學士何義門先生游號爲入室弟子贈中憲大夫父樹勳博通古今沈毅闊達以國學生游秦閩間公卿皆折節延爲上客相國尹文端公總督兩江尤器重之嘗語人曰立巖有體有用人也以公貴封中憲大夫公幼有異稟弱冠已負文譽補元和縣學生乾隆二十五年舉鄉試益潛修古學與仲弟希哲以詞賦相淬厲吳中有二陳之目三十年

聖駕南巡昆弟竝以獻賦 召試行在仲弟名列高等授內閣中書而公以論誤寫一字置乙等亦得文綺之 賜二十四年會試中式 廷試條對詳贍纒

纒千餘言而書法尤端重不苟讀卷大臣擬列第二上嘉其切直 特擢第一元和分縣以來登狀元者自公始而封君與王太恭人其慶在堂年未及耆鄉閭誇爲盛事授翰林院修撰分習 國書公一過目卽曉其竅要閱二年散館復列第一

上喜曰漢人中不易有此尋充方略館纂修官入直武英殿兼協修 起居注益以勤慎稱三十八年 詔

開四庫館公復與修纂每校一書畢卽條其撰述本旨  
評論當否悉中冑榮時館臣例得薦臚錄生數人公所  
舉皆寒素士總裁諸城劉文正公新建裴文達公咸歎  
其公正尋充文淵閣校理再充會試同考官一充陝  
西鄉試正考官兩遇京察俱列一等四十三年

特授湖北荆宜施道甫莅任遇歲歉卽捐廉以振饑者  
明年江水暴漲溢沙市隄公令吏民載土囊權塞之親  
履隄上督視七晝夜水漸退民居得無恙又明年出俸  
錢加築隄益以固歲旱依春秋脩露祈雨法又步禱  
龍神廟雨應時降荆州向有權關使者歲一變易稅額

屢缺上令裁去以大吏兼轄督撫奏公領其事檢  
束吏役勿分外需索稅額旣足商民亦無怨言四十八  
年丁王太恭人憂奔喪旋里越二年又丁封君憂殯斂  
之禮壹遵古法故宅在城東隅公與仲弟各拓數楹以  
爲封君娛老之地至是遭遺命悉以讓季弟同哲而各  
買新宅公所居在古雪街於屋旁築樓三間擬奉先人  
粟主爲家祠而庭中稍置坡石顏曰小蓬瀛有栖心物  
外之志工垂成而奄忽下世悲夫國初詞臣沿明舊  
制凡進士第一人無外用者

今天子慎重吏治內外一體遂有以大魁而授監司者

自會稽梁公國治鎮洋畢公沅及公而三然兩公皆曾  
轉坊局公直以修撰得之以是知

上之將大用公而銜恤痛淡旋復摧折此朝野所深惜  
者也公初娶張恭人壬申舉人鵬之女早卒繼娶蔣恭  
人例贈奉政大夫仙根之女善文翰庀內外事甚飭人  
以爲得賢內助子兆雄早卒次兆炎孫若芝俱幼公以  
儒學登上第而內行淳備孝友任郵人無閒言家居不  
喜與長吏還往亦不臧否人物遇故舊謙抑自下識度  
宏遠人莫窺其際詩文冲和恬雅似其爲人書法似顏  
魯公晚年不輕下筆友朋得其寸楮爭藏弄之銘曰

鳳翔千仞鵬搏九霄毛羽旣成攫身最高木天芸閣珠  
玉揮豪匪惟文章經濟克劭盤根錯節小試孟勞霖雨  
一滴膏澤崇朝溫飽匪志行誼足式歷試無玷斯爲全  
德天不假年中道而息大名旣成遑爭晷刻鬱鬱佳城  
僖敏之側青松白雲垂聲無極

贈儒林郎刑部雲南司小京官加一級補瓢韓  
先生墓志銘

吳中文獻之家首推雲東韓氏二百年來文采風流照  
映藝林振振公姓人各有集非徒以膏梁華腴炫世俗  
也補瓢先生諱騏字其武實文懿公之從子被服儒素

學有師法五歲能辨四聲始入塾聽伯姊誦唐人詩默  
記不失一字師大驚曰異日風雅材也長而記誦闕博  
爲文下筆立成顧俠君太史一見奇之呼爲小友巡撫  
儀封張清恪公課士紫陽書院擢賓第一在庠序名稱  
籍甚狀淡于榮利恥爲俗學好吟詠恬淡真率一以陶  
謝爲師春秋佳日招朋舊賦詩飲酒戶外之屢恒滿晚  
歲學益純遂嘗製補瓢歌云志士勤補拙學人善補過  
老夫志短學亦荒但補山瓢惜瓢破亦近于有道之言  
矣其事親有禮居父憂年已五十 矣三年處外過時  
而哀從子暢蚤失怙恃親撫育之以至成立治家嚴肅

博奕之具不陳於側乾隆十九年九月下旬捐館春秋  
六十有一初娶王安人再娶顧安人皆早卒三娶陳安  
人後二十七年乃卒教子孫必登于禮法鄉黨稱賢母  
焉子二人鍵歲貢生議敘通判是升附監生敕封儒林  
郎女三人壻程遵義畢楚玉蔣曾燧孫男濤附監生崧  
廩膳生對丁酉選拔貢生特授刑部雲南司七品官崧  
巖俱幼先生歿之二年卜葬吳縣香山祖塋之右又二  
十四年以孫對貴 馳贈儒林郎又三年將奉陳安人  
之匱啟先生窆而耐焉先期是升屬其子崧乞子銘子  
少從先生游得與忘年交之列先生儀觀豐偉多識掌

故與談鄉先哲軼事娓娓不勸羣從多以科第得官獨  
躡躑無所遇狀身歿而名益彰詩文流播人口且有文  
孫登朝 綸章寵錫賁及重泉古人云第五之名何減  
驃騎由今觀之蓋有過之無不及也銘曰

吳之巨族雲和韓濟生種德啟後人後先宗伯名大振  
公之王父廚俊倫舐排馬阮幾邁屯鄉人表德稱貞文  
厥考樂志大耋臻鄉飲五豆領衆賓先生早充博士員  
晚乃循例貢成均孝乎惟孝溫清勤頤神典素栖衡門  
詩詞脫手無垢氛石田磬室堪比肩舜世卅載名未湮  
江湖有集萬口傳有子若孫才軼羣贈階六品官白雲

松楸鬱鬱香山原如防如屋四尺墳文苑耆舊其人存

內閣中書舍人邵君松阿墓志銘

常熟邵氏當

高宗朝昆弟四人先後入館閣並以才名傾動日下論  
者比諸唐京兆竇氏宋鄱陽洪氏明吳郡皇甫氏焉而  
子姓相繼登科文采勿替較之昔賢殆有過之君諱齊  
熊初名炳字方虎號耐亭晚歲又自號松阿 誥封奉  
直大夫晉贈朝議大夫鞞之子 贈奉直大夫晉贈朝

議大夫甲臨之孫 封儒林郎可佳之曾孫君幼有識  
鑒弱冠喜從鄉先生游尤爲陶太常晚聞汪贊善杜林

所器重贊善遂以孫女妻焉年十九入縣庠乾隆十二年  
中江南鄉試是時兩兄杞園叔山皆先入翰林明年  
弟闇谷亦館選君三試禮部不見售十九年

御試內閣中書君名入選所賦紅藥當階翻詩傳誦都  
下君長身玉立儀觀秀偉而志趣高簡入直之暇研窮  
經史鍵戶如儒生所與往還皆一時名宿以文章氣節  
相砥礪貴游夸毗子弟或慕與交竟日不交一語也在  
綸閣時 朝廷大典禮例得進呈詩冊君所製歌頌博  
大淵雅尤得頌揚之體丁外艱旋里尋遇生母時太恭  
人憂執喪累年哀戚如禮服闋後以程太恭人年高樂

與昆弟奉侍遂不入都供職趨承晨昏者幾二十年君  
昆弟皆治古文而君好之尤專謂文必本于學與行然  
後爲有物之言古人立言皆有益於人心風俗否則譚  
言長語祇足以長浮華用以阿世則可用以經世則未  
也嘗選唐宋以來古文十八家名曰文繫於唐得三家  
退之子厚習之於宋取七家豚叔明允子瞻子由子固  
同甫晦庵於元取一家伯生於明取四家景濂正學伯  
安熙甫而以 國朝汪荅文方靈皋陶晚聞三家繼焉  
獨惡王安石之文謂其意主爭勝言涉矜夸觀其文知  
其人之悖可戒不可法也所著隱几山房稿十六卷禮

記考義十六卷隱几山房七錄若干卷生平敦孝友以型家明義利以正俗一言一動必依於法度春秋七十有七終於里第實嘉慶五年八月十有七日配汪孺人左春坊左贊善應銓孫女雍正己酉副貢某之女明慧有婦道前卒子聖珪乾隆戊子舉人女適同邑張培俱早卒嗣孫廣融乾隆乙卯舉人曾孫淵耀淵獻淵穎銘

曰

邵望出欵乃遷海虞四傳而後枝葉紛敷君與昆季式大其間木天薇省棣萼聯趨青紫匪戀循陔孔愉年周甲子猶奉板輿品以行邃文與道符著書滿家質而不夸疇昔定交冊載有餘我神久瘁君顏尙腴今春訪我攜曾孫俱詫其蚤慧可慰桑榆玉棺俄降執紼在途納銘幽室終古弗渝


顧桐井墓志銘

吳縣顧文學蕤砥行立品爲文不隨逐時好蓋儒而君子者也其父國學生桐井君旣沒將葬持事狀請予爲之銘蕤肄業紫陽在弟子行以子言爲信義不可辭也按狀君諱應昌殿舍字也桐井号也行第五又自号五癡也先世自金陵遷吳五傳至國本明季貢生祀鄉賢私謚貞孝先生者君之高祖父也長洲縣學生茲其曾

祖父也考授州同漸其大父也國學生階升其考也君性孝友父病延醫百方療治用一劑必辨論至當而後進自是遂精于醫常有奇效處方不用難得藥思以僞亂真也有弟患漏經年君親爲敷藥日四五次雖臭腐弗憚也弟歿遺孤尙幼一日芴舍失火舉家驚惶君抱姪置妻懷中曰善視之勿令怖子女雖環泣弗顧也姻黨有以爭嗣訟者縣令偏袒欲以立愛爲名詢諸預議者衆莫能對君正色曰生前或有立愛歿後知誰愛邪今以其言直遂弗能奪也君幼羸弱術者皆謂不壽初就傅母夫人戒勿多讀傷氣其師獨異之曰此子雖多

病然甚孝必能延年勿慮也君生于雍正乙卯卒于嘉慶丙辰行年六十有二也夫人汪氏候選詹事府主簿大經之女亦名族也有子二人長純而繁季也女四人嚴秉芝汪超倫毛塚施光墜其壻也郡城之某鄉某原君所藏也某年月日葬之期也銘曰  
維士有志重義輕利君雖不試孝友自厲維蓄之淡維守之欽楹書貽後以俟天譴





潛研堂文集卷四十五

嘉定錢大昕

墓誌銘四

封通議大夫日講起居注官文淵閣直閣事翰林院侍讀學士加三級陸公墓誌銘

文淵閣直閣事大理寺卿陸公錫熊以博洽通儒承

天子知遇由郎官入詞垣領袖四庫書局洵登學士

遂列九卿逢 國大慶推 恩三世尊人通議公方就

養京邸踰七望八神明不衰大理嘗被召預 重華宮

聯句 賜 御題楊基淞南小隱畫卷公以里居在

淞江南因自號淞南老人以識 君恩閱數載大理

復蒙 上賜 御題老少年詩卷公賦詩恭紀有

淞南小隱成佳話更喜 新題老少年之句朝野莫不

榮之公性耽山水不耐拘束在都下未久輒策蹇南歸

所居日涉園本明陳太僕所蘊別業清曠饒水石之趣

公更治數椽顏曰傳經書屋日焚香宴坐其中春秋佳

日招一二親串賦詩談讌不異少壯時乾隆四十八年

十二月四日無疾而逝春秋七十有八大理奉諱奔喪

哀戚盡禮卜吉於次年十二月丁酉塋公上海縣西南

二十七保鳳皇橋之新阡以張曹兩淑人祔焉禮也先

期踵門乞大昕爲文銘其墓大昕與大理托道義交廿

餘年於公修猶子之敬其敢以不文辭謹按公諱秉笏

字長卿一字葵霑世爲華亭望族元末有承事郎子順

者始析居上海之馬橋五傳至文裕公以文章翰墨知

名海內文裕之從曾孫曰起鳳明天啟辛酉副榜 皇

朝贈中議大夫布政司參議卽公會夫父也大父鳴球

廩監生累贈中議大夫翰林院侍讀學士加二級父瀛

齡雍正癸卯拔貢生石埭縣儒學教諭累贈通議大夫

翰林院侍讀學士加三級陸氏文獻舊門石埭公學行

尤高公幼承庭訓年七八歲已知作文嘗製詩賦雜體

文各數篇裝小冊置懷袖中署曰陸某稿親舊見者以爲非常兒弱冠補縣學生辛酉歲援例入成均中式順天鄉試公所作制義高古有法度聲名籍甚七上春官不遇然未嘗稍降其格最後應丙戌會試時大理方直樞廷先已典試山西公猶低頭聽唱名引試揮灑千言不見老人衰憊之氣平生雖滯於榮利而文字結習志不少衰如此公博涉經史不名一家尤惡俗學專已守殘之陋故大理承公緒論益自殖學以大其門公事親以禮與人交有信貴而能謙持躬治家皆可爲世法以大理貴 諱封奉政大夫刑部直隸司員外郎加一

大理府志卷四十五

十一

級進封中議大夫翰林院侍讀學士加二級再晉通議大夫翰林院侍讀學士加三級初娶張淑人縣學生大本之女卒於雍正十年八月三日春秋二十有五繼娶曹淑人工科給事中諱一士之女工吟咏與公拈題唱酬無虛日有晚晴樓詩稿行世卒於乾隆八年八月廿日春秋三十有五再娶曹淑人卽給事季女三淑人皆有禮法鄉鄰稱女宗子一人卽大理也女五人壻曰凌松心王時夏張坤孫朱文炯趙熾孫男五人慶循慶堯慶庚慶勳慶均孫女二曾孫女二銘曰 公生名門績學有聲誦芬詠烈若士衡兮克敦孝行孳

大理府志卷四十五

三

精經旨模楷人倫若公紀兮江湖泊宅文史跌宕手定  
叢書若魯望兮內助之懿雖穆有禮比肩唱酬若東美  
兮公有賢子領大著作并判廷尉若伯玉兮鶴髮未皤  
鸞詒疊封壽考康寧若放翁兮鳳皇之橋佳城若防者  
舊名德久而不忘季寧有墓近在雲間誰其踵之夫子  
之阡兮

贈儒林郎翰林院編修加一級晉贈奉政大夫刑  
部河南司主事加二級馮君墓誌銘

古聖之言孝也曰揚名於後世以顯父母夫揚名者一  
己之事而其父母之賢亦因有賢子而益顯此孝所以

居六行之首也若夫由父而推之以及其祖則禮傳所  
謂大夫以上則知尊祖者而世遂以後有達人知其積  
善之有自昔東坡為大父廷評行狀稱其制行甚高後  
世信之無異詞藉非有賢子孫則廷評之行或未必大  
顯於後先聖垂教豈欺我哉刑部河南司主事前翰林  
院編修欽州馮敏昌今之有道而文者也今春奉父諱  
奔喪南旋道出吳門素衣冠踵子門告曰吾父之塋學  
士大興翁公已為之銘唯先大父潛德未曜茲以某列  
官於

朝馳贈五品將勒石墓道以斷不朽謹撰次行狀請吾

子一言表之案狀君諱經邦字憲萬姓馮氏世籍廣東廉州府之欽州

國初大兵平嶺嶠而海氛尚未靖君之曾大父仁溥大父日明避寇轉徙父子相失祖妣彭指据奉姑拾木實自茹而以糗糲進姑鄉里稱曰孝婦夫父負遺骸間道歷叢山中未至家過一嶺假寐道旁夢神告之曰此地可葬遂權厝焉負土成墳人以爲孝感父應祥以勤儉起家爲太學生時州中有所謂大役者凡州官公私支應皆責里長取辦大約如宋之衙前當是役無不破家者太學慨然率同志訴諸大吏其弊遂革而家因以落

君工於制藝爲博士弟子與兩弟相切磋文日益有名及兩親沒後絕意進取或勸之輒泣然曰求祿以養親也親歿矣何役役爲乃卜築於州西九十里天馬山之南雅邨顏其室曰半畝居闌成趣軒環植花竹屋後倚山高松數十株深林掩映不見赤日暇則招二三知己吟詠風月盡醉乃已有陶靖節王無功之風春秋五十有九無疾而逝夫人李氏生子達文由歲貢生候補訓導歷署開建臨高花縣教諭事側室黃生達忠達元孫十人曾孫十三人刑部在諸孫中最長且賢髫齡時君尤鍾愛親自課讀擇古人嘉言懿行可師法者俾誦習

之以故刑部學有原本年十二而游庠弱冠而名滿海內刑部工古文詞讀其狀質直有先民規矩援坡公之例自足以壽世而猶假手於子刑部之謙也抑以予不善諛墓中人言之而人或見信故轉有取於老鈍之筆邪然則刑部尊祖之意尤可感矣

贈奉政大夫黃松石先生墓誌銘

予少時卽聞錢唐黃松石先生名又見所作篆隸淳厚有古法益欣慕之晚乃得交其子小松郡丞始知淵源所自今夏小松奉梁太宜人之諱扶輿將歸里先遣其兄子元鼎踵門來告曰先君及陳太宜人以乾隆廿二

年塋本縣上泥橋之阡某方僮穉誌石未備今吾母不幸棄養謹卜日啟先兆而合塋焉敢乞文納諸穿中子受其事狀讀之喟然曰此孝義獨行傳人物也按狀先生諱樹穀松石其字晚歲游孔林得楷木之瘿攜歸名其齋亦以自號世居杭州之錢唐六世祖汝亨明江西提學參議學者稱寓林先生夫父佑銓縣學生父兆泰贈徵仕郎先生性敏慧童時賦綠牡丹詩卽爲士林傳誦家貧隨北游侍起居惟謹比壯以筆耕自給奔波南北爲甘旨之計父歿於保定旅邸先生自里門哀經沂江渡河至棗林遇大水泛溢行旅斷絕跣足行泥淖

清石室文集 卷四十五  
中沙石所觸血常濡踝至河間覓舟不可得附蟹舟行  
遭大風幾覆溺者再始達保定訪瘞棺所在水嚙露前  
和起之已朽乃號泣函骨以歸冑雨買三尺竹自扶跣  
行七晝夜抵德州始得附舟南返繪涉水負骸圖以志  
痛王虛舟吏部題其卷比於古之虞趙焉參議公寓林  
講堂久圯卽其地葺爲廣仁義學聚書數萬卷以資學  
者先世手澤散落遇片紙隻字必質衣購之少耽經史  
於六書尤有神悟篆隸用筆渾古婁縣張文敏公推爲  
第一手詩文詞翰名重公卿有欲以經明行修薦者辭  
不應其於友誼尤篤以緩急告者傾囊無吝色視其家

無擔石儲也母喪過時猶哭竟以得病春秋五十有一  
以乾隆十六年九月廿七日卒以子貴累 贈奉政大  
夫所著有格物考河防私議百衲琴清華錄楷瘦齋集  
初娶陳宜人諱蘇字若蘭國學生某之女幼事母以孝  
聞合巹之夕雙燭忽盡其一心知不祥未及四月而卒  
年一十有八時康熙五十九年四月二日也繼娶梁氏  
諱英字梅君處士師燧之女賢而有文事兩世姑能得  
其歡課諸子萬卷樓中一燈熒熒輒至達旦好吟詠而  
集句詩尤工曾刻入大雅集先生之捐館也宜人手撰  
行狀數千言委曲眞摯門生故友見者咸閣筆晚歲就

養山左官舍年逾八秩神明不衰曩時所誦習者默記不失一字仁恕好施予冬月常製衣以待凍者恭遇

覃恩 誥封太宜人嘗語郡丞曰吾家自少參公後萊仕者唯汝一人此汝父積善所致慎無忘清白家風也乾隆六十年閏二月五日卒年八十有九長子庭國學生坐累謫塞外卒次經早卒次易今官兗州府運河同知卽小松也次童國學生孫男三人元鼎元長元禮孫女五人銘曰

蓼莪之思兮銜恤靡至萬里負骸兮瀕險而濟匪文繡而富兮匪軒冕而榮端孝之謚兮孚於鄉評有子亢宗兮唯慈訓是謹書荻諄諄兮曰惟崇公之訓贈秩五品兮賁重泉牌合良兮吉且安千秋萬歲兮比於瀧岡之阡

何桐蓀墓誌銘

錢唐何元錫夢華與余交十年矣今冬卜塋其尊人明經君於西湖普福嶺之陽啟元配陸孺人之窆而合祔焉先期至吳踵門屬銘其藏夢華篤志古學尤嗜金石刻當援瀧岡西山阡表之例自爲之文而偏有取於衰鈍之詞豈以予性朴直不苟諛人文雖未工詞或可信乎按狀君諱紀堂字山甫一字桐蓀先世自上虞遷於



杭曾祖喬雲康熙丙辰進士嘗作令湖南翔議免四十二州縣無名稅失大吏意然楚人至今尸祝之秩滿行取當授主事卽請告歸以著書終其身祖玉梁雍正癸卯進士翰林院編修文章爲一時宗仰世所稱樟亭先生也父熊雍正乙卯鄉薦知廣西之宜山湖南之祁陽二縣皆有治聲君少而明悟爲大父鍾愛長從吳雲巖修撰學爲詩文才思清瞻學使長洲彭公啟豐取入郡庠援例貢成均應南北鄉試屢薦輒不售內行淳摯孝事祖母及二親禮無違者及父官粵西祖母以道遠不欲就養君在家侍奉溫清晨夕甘旨無闕何氏宗枝蕃

衍多貧不能葬者計七十餘匱君聞而惻然請於父擇地序昭穆塋之性愜慨勇於赴人之急而不責其償其客山左也有馬別駕登鰲者假貸數千金卽傾囊予之無幾何別駕歿遺孤貧不能自存君卽焚其券雖以此致困終不悔也君精於醫術候三部脈處方劑應手輒愈愈後亦弗求報春秋六十以乾隆五十九年六月二十八日卒有詩稿二卷道樞書屋隨筆十卷又有續涪溪志四卷則侍親祁陽所葺也娶陸孺人淑懿有賢德以乾隆三十九年五月十八日卒春秋四十陸孺人生四子元銓府學生元錫元鼎皆候選縣主簿元昌國學

生蚤卒側室王氏生元鉅元符皆幼孫一人瀛銘曰  
綬之若若沒則已焉抱璞在躬久而道尊南陽伯求盧  
江子季第五之名何減驃騎淵哉若人詩禮舊門文不  
偶俗德以潤身族屬雖分皆吾一脉掩七十棺歸於窆  
交良友告匱傾貲貸之友死子弱折券置之李錄厚德  
歐表一行以今況古方策同炳澄湖汪汪宰木蒼蒼有  
子而賢積善其昌

布衣臧君墓誌銘

臧氏望出東莞其後遷浙之長興又自長興遷江南之  
武進 國朝有諱琳者以名諸生精研經術著書滿家

學者稱玉林先生是爲君之曾大父生子晉晉生若彩  
若彩子卽君也君諱繼宏字世景晚自號厚庵少有至  
性年十三失母號慟如成人每晨夕伏柩側屏息諦聽  
曰吾母其復生乎旁人嗤其癡弗爲止旣長以家業日  
落奔走服賈然造次必依於忠信嘗爲某氏持錢同事  
瞰其家孤寡可欺欲以計吞之君度力不能禁慨然曰  
受人之託坐視其欺而不言是與同惡也卽攜襆被辭  
去中歲節縮衣食稍稍自給營墓考妣及先世五殯同  
時安窆誠信有加三黨之無倚者分所有贍之平生好  
扶助人事變倉猝傾囊相濟不計其人之償否亦不責

清石堂文集 卷四十五  
異日報也嘗訪友長沙渡江兩舟並行遇暴風一舟先覆同舟者惶怖無人色君慰之曰死生有命雖恐思無益靜以待之可耳其教子極嚴有過扑責不少恕延端士爲之師課以舉子業晚歲謂子鏞堂曰文章當從經典來汝等能續我祖玉林公之傳吾願足矣又言吾身後勿作佛事天堂地獄當於生前善惡決之禮懺作樂徒爲比邱輩作快樂場耳嘉慶元年七月九日以疾終於家春秋六十有九娶章氏子鏞堂常州府學生次鏞堂禮堂祀堂孫一人始餘姚盧學士召弓數與子言鏞堂之賢因與定交及君之墓鏞堂述事狀乞銘故不得

辭銘曰

玉林遺書伏而未出什襲至君手澤無失君有賢子校而錄之士林快覩尊爲經師惟子之賢由君之教不言躬行孝乎惟孝豐西之鄉四尺其封善必有後允哉是翁

嚴半庵墓誌銘

子與歸安嚴文學元照交有年矣子假館吳門相去僅兩日程聞其家多藏書而尊人善教子乘興欲往訪之輒以事阻不果今冬元照墨線至子館舍稽顙而言曰吾父以今年六月十三日弃養行且卜塋思所以不朽

吾親者惟先生之女是賴子辭不獲已乃卽其行狀稍  
詮次之按吳興嚴氏本貫平江之嘉定明洪武初有達  
卿者避亂至歸安之石冢村始占籍焉有子曰毅毅生  
敬官監察御史河閒長蘆運鹽使敬生齡齡生宇宇生  
茹茹生贈奉直大夫刑部員外郎而泰而泰生縣學生  
正思正思生府學生欽欽無子以弟之子縣學生爾琪  
爲後卽君曾大父也大父躬逢德清縣學廩生父秉謙  
府學廩貢生候選儒學訓導母嵇孺人生子四君最幼  
弱齡有至性甫九歲聞兄殤號慟不食者三日族黨咸  
異之讀書警悟初習制義下筆頃刻千言成童後患瘵

積久之不愈父母恐其苦思致疾乃納粟爲國子監生  
父嘗命主出納管鑰數年纖毫無所私父喜別賜之千  
金及父病瘵經歲君出所賜金買人葺和藥以進未嘗  
私一錢也性忼慨喜周人之急雖解衣稱貸不少惜爲  
人排難解紛必盡力有負之者亦弗與校中年以後困  
于外侮所向恒不如意又艱于得子年四十始得子元  
照甚慧三四歲卽能作擘窠書君喜甚思所以教子者  
則曰浮而不實非學也於是聚書數萬卷遇宋元槧本  
不惜重價購之元照旣長延名師督課舉業之外兼及  
羣籍旣入膠庠有名矣則又曰博而不精非學也士以

通經爲本窮經必通訓詁而文字聲音則又訓詁之所由出舍古訓而以意說經大道之多岐必始此矣元照遵其訓於是有娛親雅言之作每辨論古義必進質於君而後筆之遇有排擊先儒過當者則又誠之曰辨而爭勝非學也議論深刻非徒招忌亦恐損福不願汝曹效之也元照以高才生試行省屢躓人或以爲病君則曰窮達自有命耳古人以少年登科爲不幸姑盡其在我可矣噫今世教子弟者汲汲於利祿讀世俗浮濫之文數百首便可弋獲視通經學古之儒指爲迂濶何怪乎士風之日薄乎予故舉君之教子以爲法君諱樹萼

字茂先一字半庵年六十有七以嘉慶五年六月十三日卒元配許氏次陳氏次亦陳氏次莊氏俱無子筵室范生一子卽元照歸安縣學生孫男二人培均女二人銘曰懸黎在握世所寶兮不如有子之率教兮袍笏盈床衆所好兮不若鉛槧之可樂兮鞠子之勞兮未食子之報兮維令名之劭兮庶以榮厥考兮

郭肯構墓誌銘

三晉以孝友世其家者曰平遙郭氏五世同居門無異財縣學生樸村肯構兩翁寔董其家政每督學使者至輒旌其門以示勸士大夫無不翕然稱之今春肯構翁

卽世將卜葬于城東十里之長寧原其從子興讓狀其  
行事乞余銘興讓與余同年進士卽樸村翁之子也讀  
其狀質而無溢美故樂得而書君諱大址肯構其字始  
祖思忠自陝西渭南縣徙平遙之王郭村其十世孫曰  
三耀三耀生縣學生紹儀紹儀生三子長爾強是爲樸  
村之考季爾翰寔生君故君子樸村爲從父昆弟君少  
樸村一歲總角時食同器臥同榻入塾同視席旣冠同  
籍學宮自壯至老晨夕相依其友愛雖同產不是過也  
君狀貌嚴重鬚長尺餘事親孝交友信視端行直非禮  
不動家世同爨食指緜多而樸村翁性曠澹事無大小

悉委之君每辨色卽起諸子姓上堂問起居惟謹婚嫁  
喪祭必裁以禮平居服用皆取儉朴惟課子弟讀書必  
延名師一門羣從學業皆有師法平遙三百年來以進  
士起家者自興讓始君之教也興讓之孫于君已親盡  
君撫視之如已出有過失輒加箠楚君旣不以屬踈引  
嫌家人亦帖然無少嫌也姑之子某負官錢二百緡吏  
逮治之急旦夕且瘐死君贖白金詣縣庭代輸之事得  
釋諸姑之孫以貧告者君出貲數百金俾各作生計折  
閱殆盡無愠色或諷君不善殖財則曰吾家藉先世遺  
產頗饒足彼雖遠戚自吾祖視之皆外孫曾也吾敢私

先人所有哉君生于康熙三十二年六月十三日卒于乾隆二十九年三月十六日春秋七十有二配高氏子男一人于京國學生女三人適國學生梁琨介休縣學生范翰光國學生張應璠孫男三人豐型豐烈豐孚銘曰子壯出分俗自秦別籍異財始弟昆戚單服盡行路均不念厥初同一身范道根李聖伯五世同居表史冊誰其繼之平遙郭千秋萬載旆貞石

孝廉蔣君墓誌銘

乾隆庚子秋餘姚邵二雲侍讀典試粵西得人最盛全

州蔣君德載其一也子嘗訪粵士文行兼脩者於二雲二雲輒舉君名予故耳熟焉而未之相識也今冬君之兄郡司馬雲亭來告君之訃且狀其行乞子銘讀之泣然知二雲之言不我欺也君諱勵容德載其字世居全州萬鄉龍水村州中言望族者必首蔣氏父振葵直隸慶雲縣知縣有子六人君次在五少靜默寡言笑而善承親意慶雲公嘗指以語宗人曰是兒孝我處伯仲間怡怡愉愉自幼至壯如一日讀書潛玩義理遇有疑滯反覆思之恒達旦不寐久之亦譟然以解尤愛宋儒書博觀約取務在切近易行爲文直抒所見不喜爲帖括

揣摩之陋諸兄強之應試補博士弟子年三十六舉於鄉公車屢上輒躓吏部注選知縣需次南還平生無聲色靡曼之好無機械狙詐之習重義輕利篤舊慎交徜徉山水間泊如也與司馬幼同學勸善規過相敬如執友司馬攝青浦令時君往視之適歲暮徵漕粟君入庠鈎稽簿籍閱視斗斛雖滑吏莫敢上下其手君娶曹氏無子年五十有一以乙卯正月十八日終於里第遺言以司馬第三子啟錦爲後卽以其年某月日葬二雲爲子乙酉典試所得士君出其門與子有通家之誼不敢以不文辭銘曰

惟漢舉士興孝察廉家修無玷東帛乃占近代鄉貢登於禮部名曰孝廉實則未副恂恂蔣君佩實銜華內行淳篤潔白無瑕軒冕匪榮名教自樂沒而名稱豈爭旦莫金盆之原佳城鬱然過者必式曰惟真孝廉之阡

嵇靜園墓誌銘


君諱文揆字大醇一字靜園無錫人文華殿大學士贈少保文敏公之曾孫文淵閣大學士 贈太子太師文恭公之孫翰林院侍讀聃軒公之嗣子自文恭公以上勲德具載 國史君天資雋爽好豪飲視阿堵物若無所覩隨手散去亦不甚惜中歲遵川運例入貲當得



府經歷掣籤試用江西嘗委署南昌吳城同知饒州景德同知廣信弋陽縣丞終未得實缺君嘗自言吾官當至四品壽至八十卽與君厚者亦謂君之門地才氣必能副斯言也乃奔走簿領十餘年訖無所遇鬱鬱不自聊年四十七卒於弋陽官舍娶同邑鄒氏子一人國子監生峻女二人長適歸安縣學生嚴元照次許字程孫男一人女二人憶子初入詞館文恭公方位少宰以後進禮通謁卽荷獎借以詩古文相期許每有經進文字輒招與討論可否其後十餘年子與晴軒同侍直上書房寅入酉出寒暑無閒課誦之暇相與縷述家事不

異昆弟旣而各有視學之命子往嶺南晴軒往關西宦迹邈隔音問遂踈子奉諱歸里遂不復出晴軒任滿還朝未幾捐館傷其無子聞以弟兵部長子爲後亦未得謀面也乾隆庚戌子以祝嘏抵都門文恭公時爲首揆親訪子寓邸談諧如平時以子之鈍劣踈懶尚在元老記憶之中古道良可感已及文恭公薨子適以病蹙未與執紼私心恒以爲歎今又聞君之訃孤子峻踵門求銘俛仰交情轉瞬四世老成久逝蘭蕙俄摧而子亦頽然將老昔人云旣痛逝者行自念也悲夫銘曰相門世嫡而官以八品止膂力方剛而算不盈四紀生

潛研堂文集卷四十五  
未相識歿銘其藏述德感舊以誌不忘



潛研堂文集卷四十五

門人吳嘉泰校字

